

東
華
續
錄

東華續錄

同治四

臣王先謙敬編

臣張式恭恭校

十二月甲寅朔諭議政王軍機大臣等前因湖南軍務緊要江忠義未能赴黔諭令田興恕兼署貴州巡撫惟該大臣以督辦軍務爲重所有巡撫篆務日久恐難兼顧著駱秉章於湖北湖南兩省司道大員內擇其畱心民瘼長於吏治並熟悉貴州情形者秉公保奏一二員候旨派往貴州署理巡撫事務再前有人奏田興恕目不知書不達政體其前後左右皆讒諂面諛之人憑藉權勢請託公行該提督趾高氣揚毫無顧忌其奏報勝仗種種不符等語田興恕驍勇善戰自屬可取若如所參聽信左右之人顛倒是非不辨賢否豈復堪膺節鉞重任如果目不知書則奏牘一切假手

於人尤難保無弊竇賂秉章於田興恕之爲人自屬深悉是否因
驟居高位肆無忌憚其奏報軍情有無不實該督諒亦必有聞見
均著秉公查奏毋稍徇隱將此由六百里諭令知之○諭曾國藩
通籌進剿機宜○予安徽陣亡參將于殿甲知府寶元灝祭葬世
職○乙卯召前任戶部左侍郎羅惇衍大理寺少卿田雨公雲南
提督傅振邦陝西提督孔廣順甘肅甯夏鎮總兵官鄭魁士降調
浙江布政使徐宗幹來京聽候簡用○丙辰諭內閣前因僧格林
沁覆奏譚廷襄將業經勒休降調道員王觀澄派令帶勇委用非
人藩司清盛之父柏齡往遊泰山該藩司不能諫止泰安縣知縣
方振業輒爲豫備公館意存見好均屬咎無可辭當經降旨將譚
廷襄等交部分別嚴議議處據吏部議奏請將譚廷襄等分別降
調等語前任刑部郎中柏齡山東布政使清盛均著照部議降四

級調用前任泰安縣知縣方振業著照部議降三級調用山東巡撫譚廷襄著加恩改爲降三級畱任○諭議政王軍機大臣等譚廷襄奏遵議河防布置並曹郡近日情形一摺見在蓮花池竹口賊寨已經國瑞等帶兵攻克劉占考等亦窮蹙乞降濮范東岸毗連鄆城鉅野荷澤等屬見經僧格林沁親統大兵在羅河口一帶著一面肅清沿河北岸一面派兵駐紮曹州郡城相度機宜講求清釐團寨之法辦理一處務卽了當一處不可稍涉遷就責成該地方官將善後事宜詳慎妥實經理山東省大半糜爛而尤莫甚於曹州此處辦理著實卽其餘東昌沂兗均可次第戡定著該大臣等妥籌辦理一面知照譚廷襄將移汛安營及馬良集團營一切善後章程豫爲籌辦東昌教匪素與直隸曲周雞澤一帶多所勾結此時匪等乞降須防反覆卽誅鋤亦驟難淨盡勝保將欲移

軍南下必須酌量分撥一軍仍紮東昌等處要地並著文煜於直東邊界地方備兵策應以防衝突至濮范防務譚廷襄所帶兵勇千餘實屬不敷分布著僧格林沁酌量另撥馬隊五六百名駐紮東昌交該撫調遣河西開東一路應由文煜派兵駐守並飭地方將渡船全撤西岸以杜竄越河南省考城縣與曹縣毗連雖係乾河尙有隄壕可守應由嚴樹森隨時堵截均著各該督撫等實力辦理各專責成不准稍涉鬆懈譚廷襄原摺均著鈔給閱看將此由六百里各諭令知之○諭譚廷襄奏遵籌防河布置事宜並陳近日曹郡勒匪情形及親赴東昌派員查拏武定鹽梟各摺片大清河自李連橋以上卽爲黃水穿運之處毗連濮范等處匪蹤徧地見雖經官軍勦撫兼施而水套內伏莽尙多荷澤一帶圍寨亦與賊匪暗通該撫因請飭僧格林沁肅清沿河北岸另派一軍駐

案曹郡並請飭勝保南下時仍應畱軍北路扼要駐紮及直豫境內協力堵剿所籌尙屬周妥已諭知僧格林沁等酌量辦理惟河沿北岸雖諭僧格林沁力籌肅清而匪勢旣眾一時未能撲滅河道紛歧不可不豫爲防範張秋鎮已經該撫設立礮臺派兵扼守其上游范縣等處著一併查勘添造以資堵禦河面較寬之處爲礮所難及者卽著酌量情形添製礮船該省雖無諳練撐駕之人該撫當加意講求未可畏難苟安所稱移汛安營及馬良集團營並著迅速辦理山東全省糜爛見當籌畫辦理之方如何用人如何理財次第舉行以收實效該撫見赴東昌務將該郡應辦事件妥籌辦理不必急於回省轉致顧此失彼其武定鹽梟已經撥兵捕拏務當嚴行懲創使之畏懼兵威斷不可稍有將就了事之心水套之賊據奏兵力不能遽及著設法收集船隻埝渠堵穴見屆

河冰堅凍，剿除尤易，不准稽延貽誤。將此由六百里諭令知之。○
丁巳諭議政王軍機大臣等：勝保奏濮范教匪蕩平，河口肅清，見
籌善後一摺。濮范一帶匪眾經官軍剿捕屢勝，見在各旗教匪並
捻匪巨股均經畏威投誠。該大臣於降眾中挑選一千餘名隨軍
助剿，俾受箝制。其餘老弱概令歸農辦理，尙屬妥協。惟該降眾人
數眾多，恐大兵移撤之後復行萌動，務須妥籌善後，經理得宜，並
督兵暫駐東省彈壓地方，以定人心。另片奏添募裁撤勇丁，卽照
所議覈明數目造冊報部，以免糜費。宋憬詩馬隊業經分別裁撤，
亦須妥爲安置，毋令聚而爲匪。正在寄諭間，復據譚廷襄馳奏南
捻五旗並出，由陽山竄至單縣境內，及金鄉縣石佛集等處。僧格
林沁之軍見移紮洪川口一帶，距單縣不遠。新收劉占考降眾多
係曹州土著外匪，一至恐復生心。且曹屬北路有兵，東路無兵，必

應速爲豫備請飭勝保順道進兵與僧格林沁併力勦辦當可聚而殲旃等語著勝保迅卽會合僧格林沁大軍併力勦辦儻能趁此軍威將曹屬賊匪全行掃蕩該大臣安心南下可無後顧之憂勝保謀略素裕洞悉兵機定能迅奏膚功以慰廑念將此由六百里諭令知之○諭勝保奏捻首投誠見在籌辦收撫善後事宜一摺直東教匪挾眾橫行今已屢受大創羣酋一律乞降自應宣示威德許以自新惟匪數眾多箝制不易著文煜譚廷襄各派賢明精細之員會同各該地方妥爲安插毋令再滋事端儻能各安生業各團練丁役人等亦不得牽引前事挾仇妄拏致大兵撤後本地再爲後患勝保見回館陶辦理善後一切事宜將來總須統兵南下所有安置各匪眾卽責成文煜譚廷襄妥爲料理毋使從而生心謀爲不軌此事勝保止能辦其大概全在各該地方官經理

得宜如果有派辦之員奉行不力再釀後患朕惟文煜譚廷襄是問勝保另片奏大名鎮總兵阿麟保人稍忠厚於軍務緊要之處不甚相宜請將通永鎮總兵伊綿阿對調阿麟保是否僅人地不宜抑有庸懦不能得力之處並著文煜確切查明據實覆奏再降諭旨正在寄諭間據譚廷襄奏報南捻出巢竄至單縣請飭勝保會合僧格林沁大軍剿辦一摺業經諭令勝保會同僧格林沁剿辦矣即著譚廷襄督飭官兵相機策應其直東交界地方並著文煜嚴飭該文武妥爲防範毋稍疏懈將此由六百里各諭令知之○以貢璜爲山東布政使孫治爲山東按察使由直隸天津道遷○戊午僧格林沁西凌阿國瑞奏探報匪首劉占考之弟劉占桃及賊目梁繼海率眾占踞紅川口民圍臣等於十一月十八日移營王家海二十日督帶官軍礮位並飭知府趙康侯等帶勇前往用礮轟

擊該逆仍復死守

臣

西凌阿督令兵勇先越濠牆由東面攻入克

州鎮總兵札隆武知縣陳烈各帶勇隊自西南分路攻入斃匪數百名賊匪欲撲西門經營總富和帶隊擊回

臣

等當將馬隊調至東門外左右設伏旋有馬步賊匪千餘奪路逃出經營總蘇克金等帶領馬隊追殺十餘里至劉家橋劉占考老巢斃賊千餘名並將賊首劉占桃梁繼海殲斃圍內之賊投殺無遺

臣

等卽於二十一日移營紅川口迤南是日復帶兵馳剿劉占考老巢該逆之弟劉占先率黨死守我軍奮力圍攻該逆乘夜向南逃竄

臣

等督飭兵勇移紮劉家橋圍內立將賊圩平毀二十三日移營郭秉鈞老巢迤東之寶珠口當派投誠之李燦章將郭秉鈞之弟郭秉鑑郭秉鑽誘出飭各營步隊前往將圍圩攻破斃賊數百名並將郭秉

鑑郭秉鑽正法二十五日移營曹州府東南大屯地方紮營未定

突有馬步賊匪數千來撲臣西凌阿督帶馬隊迎剿該逆列仗抵拒營總蘇克金繞賊北面衝壓逆勢不支遂均敗退我軍追殺十餘里斃賊千餘名餘匪向南竄逃二十六日督兵進攻佃戶屯賊圩圩民龐勳等出圍乞降聲稱賊首劉前已率眾南去圍內俱係良民等語當卽准其投誠繳械我軍撤隊回營二十八日探得曹屬定曹等縣逆匪在金隄頭迤南大董店等處屯聚二十九日臣西凌阿帶領馬步官軍進剿行至大張寺地方該逆馬步萬餘列仗來撲營總蘇克金等將賊擊退該逆隱伏各邨俟我軍撤回全股復出猛撲臣西凌阿復派各隊向西南斜擊馬隊奮力衝壓該逆紛紛敗竄我軍追殺十餘里斃賊千餘名餘匪仍竄入各邨伏匿查曹州府迤南曹縣各圍流爲賊圩匪勢甚眾應察看情形相機進剿臣國瑞帶兵進攻范縣城池於十四十六等日用礮猛攻

賊勢窮蹙城賊郭廷珍等具稟投誠二十日臣國瑞督帶馬步兵
勇馳抵范縣郭廷珍出見當令呈繳器械郭廷珍等卽率眾出城
將槍礮馬匹交出官軍入城安撫居民其善後事宜咨行山東巡
撫派委道府大員前往辦理前經譚廷襄收撫之王來鳳亦於是
日來營臣國瑞曉以大義王來鳳情願反正仍帶團丁防守河岸
並據王來鳳面稟劉占考等亦願投誠臣國瑞飭令王來鳳就近
前往臣勝保軍營稟明辦理臣國瑞卽帶隊起程馳赴曹州軍營
會鞠臣僧格林沁接據淮徐揚海道吳棠稟報藍旗捻逆劉添詳
劉添幅等於十一月十八日由永城一帶北竄黑旗捻逆李加膺
等於二十日後起行又據探報南捻馬步由金鄉城南之甘魚頭
一帶竄至單縣迤南興隆集等處盤踞似欲西竄定曹接應賊黨
各等情臣等惟有激勵兵勇相機截剿再查馬步各隊在羅家樓

紅川口劉家橋郭家唐房等處攻破賊圩屢獲勝仗 上諭內閣
曹州會匪占踞紅川口等處民團經僧格林沁等督帶官軍攻擊
疊將賊圩平毀斃賊甚眾侍郎國瑞帶兵進攻范縣賊首郭廷珍
等窮蹙投誠當將縣城克復辦理甚爲得手著僧格林沁乘勝進
攻將各股捻逆次第殲除毋畱餘孽○僧格林沁奏查捻匪見有
廣按銅鐵情事亟應嚴禁偷漏其工匠私爲成造及偷賣火藥硝
磺均應一律查禁除派員訪緝外並咨行山東撫臣譚廷襄飭令
地方文武嚴行禁止至簡精銳之師直掩賊巢固屬攻其不備惟
曹州東昌等處土匪尙未蕩平且東境各匪無不勾通南捻設我
兵南下賊匪繞越而北互爲結連剿辦更難著手見在壽張縣屬
賊圩均已攻克並收復范縣城池其餘匪徒有勝保一軍足可剿
辦曹屬一帶賊巢雖屢經攻破而曹州府南賊匪過多已調國瑞

帶兵來營合力剿辦應俟曹屬蕩平後酌度情形或移紮東昌進
剿或督師南下之處候旨遵行先是竹口未克賊眾兵單經臣咨
會勝保就近撥兵會剿該大臣坐擁重兵觀望不前十一月初三
日國瑞督飭翼長舒通額等擊賊獲勝將賊首僞元帥張姓徐姓
殺斃並獲投誠守備宋憬詩鈐記一顆查宋憬詩係勝保招撫之
人何以鈐記尙在賊手西凌阿前在東昌一帶剿匪亦獲有宋憬
詩功牌其中恐有不實不盡至國瑞進攻竹口並迎剿援賊獲勝
後旋有勝保營中前來招勇之人勾引各營勇丁口稱月給口糧
銀三兩二錢臣營勇糧係月給二兩六錢以致國瑞所部勇丁應
募甚多兵心搖動經國瑞派弁將招勇之李登祥拏獲據供係在
勝保軍營充勇經副將黃得魁發給招勇札文復訊出李登祥冒
戴五品軍功濶入各營招勇情形當將該犯正法查黃得魁係勝

保軍營帶兵之員既發札文招勇勝保何得不知顯係故掣兵勢
理合據實請旨查辦 上諭議政王軍機大臣等前因勝保奏侍
郎國瑞力攻竹口捻圩未下兵勇受傷甚多各圩皆可就撫不必
重煩兵力是以諭令僧格林沁酌度辦理茲據該大臣奏國瑞已
攻克壽張縣屬賊圩收復范縣城池見因剿辦曹州府南賊匪調
該侍郎來營合剿俟曹屬蕩平移紮東昌或督師南下所籌悉合
機宜著卽督飭妥辦勝保近以招撫劉占考全股濮范等處一律
肅清卽欲移師赴皖辦招撫苗沛霖事已諭令將善後事宜妥爲
安插再行南下劉占考一股是否真心投誠卽係別有詭謀勝保
固請南下於辦理苗練一事是否有益勝保去後該大臣能否兼
顧直境使捻蹤不至北犯降眾盡可相安該大臣洞悉兵機諒能
謀畫萬全著卽迅速覆奏以慰廑系其曹屬賊匪仍著該大臣督

飭國瑞迅速剿洗或咨會勝保進兵夾擊以期及早蕩平所稱搜獲宋憬詩偽印功牌及勝保派李登祥招勇經國瑞正法其中總有不實不盡之處不妨咨會勝保辦理以免宵小從中煽惑至勝保之爲人負氣任性輕聽人言誠所不免惟念其辦事勇往尙屬可用見當需才之時不能不稍假事權仍當諭令力除積習共濟艱難僧格林沁素矢公忠亦必不至稍存意見也前據御史楊榮緒奏參國瑞苞苴賄賂令議政王軍機大臣傳詢該御史旋據指出盧朝安厚饋一節茲據該大臣片奏查明並無其事等語所奏自係的確該侍郎既能打仗奮勇卽屬良將仍應屬令勉勵圖功儼此後查有聽情受賄等事尙可隨時參辦毋稍徇隱將此由六百里諭令知之○諭前據嚴樹森奏東匪竄入豫境諭令該撫速行剿捕茲據奏該匪竄入滑溶湯陰等屬復由新鄉竄入原陽等

處並將東直各匪偏處情形繪圖貼說呈覽等語東匪竄擾豫境
窺伺懷慶見經嚴樹森派撥重兵攔頭截剿當可無虞西竄然使
偏令東歸不能大加懲創則難保該匪不再圖竄擾副將楊飛熊
等既據該撫奏稱係屬勁旅卽著督飭實力剿擊悉數殲除以塞
賊膽卽或被剿東遁該副將等務當越境跟追會合直東等處官
軍認真夾擊勿畱餘孽令匪徒不能再窺豫省方爲妥善至東省
之教匪會匪到處蔓延要以東昌曹州爲巢穴見在劉占考等雖
經收撫而此股匪徒竄擾如故且大名各屬徧地匪蹤亦安得謂
河北已就肅清見惟擣其巢穴盡絕根株自可無虞滋蔓僧格林
沁專辦山東軍務譚廷襄身任地方均屬責無旁貸勝保見亦飭
令進兵曹屬所有東昌曹州各匪除已就撫外其餘匪眾卽著僧
格林沁勝保譚廷襄悉心會商迅速調派得力官軍分投進剿務

期埽穴擒渠一律淨盡不得稍涉遷延意存粉飾其大名各屬匪眾並著勝保派兵按剿速行剪除卽著文煜嚴飭地方文武一體會剿嚴扼北犯僅有疏虞惟文煜是問將此由六百里各諭令知之○諭賈臻奏巨捻乞撫請旨遵行一摺安徽潁阜間巨捻郭名棟習與苗逆爲仇前因壽州被圍曾爲副將黃鳴鐸招其部眾進攻苗巢見聞勝保將次南下先赴賈臻營前乞撫潁毫各股捻匪爲數甚鉅勢難悉數殲除自應剿撫並用以期漸次廓清郭名棟去逆效順立志旣堅應卽准予投誠令其立功贖罪以孤苗逆之勢賈臻旣駐潁郡卽著將招撫事宜就近先行辦理該練圩偏處苗練羣捻之間勢難顯然自拔擬請暫緩薙髮俟立功以後卽一律薙髮亦著照所請辦理惟該練眾至六萬餘名之多良莠不齊務須善爲駕馭庶免再滋事端並著袁甲三彭玉麟妥籌兼顧毋

令再行反覆所稱郭名棟密派隊伍截剿苗逆東援練眾並俟楚軍於正陽壽州開仗時卽率所部攻剿下蔡以分苗逆之勢著袁甲三等卽飭令郭名棟相機妥辦及時立功自效另片奏沈阜捻首趙錫如被擊窮蹙赴廬鳳道葉春培處投誠經葉春培散其黨與並擇畱精壯百餘名應用著卽責令該捻首立功自贖並將捻首秦宣嚴捕務獲以淨根株將此由六百里各諭令知之○諭前因浙江軍務緊急疊諭慶端速行出省督剿並調兵由海赴援並諭令毓科調派劉于溥等兵勇入浙救援茲據薛煥奏浙省自紹興失守賊眾數十萬圍攻杭州張玉良中礮殞命見惟記名總兵況文榜一軍尙駐鳳山門外並探聞紹興府屬各縣悉行失陷甯波府失守各等語浙省賊勢猖獗復由紹郡攻陷甯波省城愈形危急且該匪於甯波擄掠釣船爲縱橫海上之計恐愈不可收拾

慶端接奉疊次寄諭諒已卽行出省馳赴閩浙交界督辦防剿惟此時浙省全體糜爛但能保守省城庶各屬尙可徐圖恢復閩省派往官軍須由南路進剿固足以分賊勢而於杭州省城尙恐緩不濟急著慶端卽於臺灣漳泉等水師內挑選精銳數千名配齊礮船糧餉剋日由海道馳赴浙江探明捷徑迅速救援杭州其溫州黃巖等處水師如有可調派則去杭較近並著慶端一併派撥由海援杭其前調陸路援軍仍著催令分路進攻如事機緊急慶端卽親督各軍出省赴援浙省係該督兼轄省分何路可以進兵奏見在浙省待援急迫著督催道員劉于濤等星速統兵前赴浙江相機進剿此外如尙有可撥之兵並著添撥設法繞道前進毋許稍存畛域之見致有貽誤將此由六百里加緊諭令知之○諭

前因浙江嚴州等城先後失陷杭州甯波危急屢經諭令曾國藩速籌援浙之師並令左宗棠取道三衢與李元度之軍星馳赴杭力解城圍茲據薛煥奏稱杭城被圍四十餘日賊匪有數十萬之多該逆堅築木城數十里內外不能通氣前由上海雇船從鼇子疊入江運送軍糧礮火接濟杭省因十城門均有賊營阻隔不能運入城中兵民無從得食勢難持久等語杭城危急萬狀設有疏虞大局何堪設想曾國藩節制四省責無旁貸前經諭令籌撥楚師援浙尙未覆奏著卽懷遵前旨迅速派調並將布置情形速行馳奏以慰廑念左宗棠此時諒已入浙著卽會合李元度一軍星馳赴杭力保危城至鮑超一軍見駐甯國距杭州省城較近若由廣德州取道入浙既可徑援杭城兼可分援湖郡或徑由徽郡取道於潛昌化進援杭城並著曾國藩飭令該總兵相機辦理此時

浙省徧地逆氛自應先其所急曾國藩務卽飭令鮑超星夜援浙以顧全局至甯波一帶著左宗棠於杭城解圍後分兵接應力圖克復浙東各城毋令久踞東南半壁大局關係非輕應如何添兵援應迅掃賊氛該大臣等諒能統籌全局不至貽誤事機也將此由六百里加緊各諭令知之○己未諭內閣前因蠲緩各省錢糧恩旨往往爲地方官吏抑閣以致屯膏不得下逮疊經通諭各直省督撫認真辦理以恤民艱其地方完善及並無災歉之處自應輸將踴躍惟正之供茲據周祖培奏北省近畿各處漸多倚恃團眾抗糧拒捕之事其故由於州縣不得其人平日臨財貪墨辦事武健爲民深仇疾視甚至日久賞罰不信告令不遵脅制官長而爲之官長者亦不敢與之相較等語我國家深仁厚澤淪浹民心見在山東河南等省遭賊蹂躪及間遭災歉地方屢經降旨分別

獨恤其完善地方均尙能爭先輸納然如該大學士所奏情形亦復早有所聞總由官吏不肖有激而成誠堪痛恨著各該督撫於所屬州縣務各秉公遴選潔己愛民之員俾膺民社如有貪聲劣迹平時不得民心者立予嚴參重懲經此訓諭之後儻有地方牧令奉職無狀以致民間怨毒釀成聚眾抗糧之案滋生事端必將該管督撫上司各官一律重懲決不寬貸凡爾百姓皆吾赤子具有天良得一親民之牧令必當無待追呼而輸將恐後斷不至藉口官吏輒敢抗違朝廷賦稅自爲亂民以取罪戾也將此通諭知之○申諭各省整頓鹽務○庚申恭上 大行皇帝 尊諡 廟號翌日頒詔天下覃恩有差○諭議政王軍機大臣等譚廷襄奏南捻出巢尙在單縣一帶盤踞邊馬四出攻撲民寨拏獲被裹難民供稱匪等商議北竄等語見在僧格林沁駐軍曹州國瑞之軍

亦回抵長溝即可移師進剿是北路及東北均有大兵堵禦惟該逆究從何路竄撲尙難豫料勝保見在館陶將欲移軍赴皖務將北路肅清方可他往諒其所帶馬步各軍未卽啟行著該大臣等卽乘此機會併力曹南以爲一鼓殲除之計譚廷襄見赴東昌著將續探軍情卽行徑報僧格林沁勝保軍營會商辦理庶可聯絡一氣總期先發制人先將此股敗匪殄盡方可乘勢掃其巢穴淨絕根株該大臣等諒能同心勦力迅奏膚功也將此由六百里諭令知之○諭部院倉場嚴懲書吏花戶舞弊○詔各省隨時甄別捐輸保舉人員○廣四川崇慶漢萬大竹仁壽安岳池三臺中江遂甯富順等州縣學額各一名○辛酉曾國藩毓科奏近年以來江西屢被賊擾本年三月七月僞侍王李侍賢僞忠王李秀城先後由江入浙皆以廣信爲出入之途是欲保江西宜於廣信設防

欲援浙江宜從廣信進兵必然之勢也自紹興失守杭州危急臣等日夜憂懼以浙境一日不靖則江西一日不安屢次函商救浙之策無如地廣兵單不敷分布而浙中賊勢浩大亦非數千人所能救解臣國藩見令鮑超一軍由青陽前進朱品隆一軍由石埭前進會剿甯國欲以分制浙中賊勢第恐僞輔王悉眾堅守勢難遽拔甯郡之城卽不能少解浙江之阨惟幫辦軍務太常寺卿左宗棠久駐廣信距浙較近其平日用兵取勢甚遠審機甚微近日屢與臣等書函毅然以援浙爲己任督臣慶端撫臣王有齡亦奏請左宗棠統軍入浙臣等往返熟商卽請左宗棠督率所部進援浙江並將駐防徽州之臬司張運蘭駐防廣信之道員屈蟠駐防玉山之道員王德榜參將顧雲彩駐防廣豐之道員段起各軍及副將孫昌國內河水師均歸左宗棠就近節制調度左宗棠見駐

廣信距臣國藩安慶行營已隔千餘里入浙以後相去更遠聲息難通遇有轉奏請旨之件誠恐耽延貽誤嗣後該處一切軍情應由左宗棠自行奏報以期迅速至其所部各營與信防各軍欠餉太多臣等擬將信郡各屬本年錢漕撥歸徵收以清廣玉各軍積欠並將河口景鎮婺源金撈歸該京卿以清各營積欠俟各軍整飭就緒卽行分途進發內防外剿進止遲速均由左宗棠相機辦理又奏前奉諭旨飭催衢州總兵朱品隆迅赴本任臣查浙江危急情形在杭州甯紹而不專在衢州欲拯浙江之危宜以大隊直赴省垣不宜僅顧衢防臣等見擬飭左宗棠一軍由廣信進兵以救浙江上游鮑超一軍由甯國進兵以分浙中賊勢至總兵朱品隆一軍兵數不滿三千不能獨當一路臣已令鮑超由池州進青陽朱品隆由祁門進石埭然後會合一路以攻甯國該二軍者

分支則互爲聲援缺一則不能獨進衢州自解圍以後防務較鬆
閩浙督臣慶端奏明卽日赴衢督勦李定太似可抽身赴衢不必
待朱品隆前往接替且朱品隆久帶湘勇征皖數年形勢熟諳畱
皖則人地相宜赴衢則難期得力審度情勢自以先赴甯國爲妥
上諭議政王軍機大臣等曾國藩毓科奏探知紹興失守杭州
危急商令左宗棠督率所部赴援並將張運蘭等軍均歸調度一
切軍情由左宗棠自行奏報並撥所部各營兵餉一摺所籌與前
降諭旨甚爲符合深協機宜惟浙省自紹興失守後賊匪圍攻杭
州眾至數十萬況文榜等因賊眾未能進攻杭城萬分危急浙西
惟存杭州湖州兩府設再淪陷則賊勢聯成一片攻勦益難措手
著曾國藩催令左宗棠統領所部迅速前進其臬司張運蘭等水
陸各軍均照議悉歸左宗棠調遣一切軍情卽著左宗棠自行奏

報該京卿務須星速進剿設法馳救杭州再圖收復各城左宗棠
軍餉仍著毓科源源接濟毋許遲誤至道員劉于濤知府丁峻之
兵勇四千四百名應否調派赴浙抑左宗棠兵力已厚無庸再令
前往卽著曾國藩左宗棠毓科酌量辦理其鮑超一軍見在青陽
著照該大臣所擬飭令會合朱品隆分道並進迅攻甯國以掣浙
中賊勢如甯郡未能卽拔或有間道可以馳援杭州湖州均著飭
令該總兵等隨時相機酌辦將此由六百里加緊各諭令知之○
諭勝保奏續派官軍截剿彰衛竄匪並擬赴直豫交界督率調度
一摺東省捻首焦克昌等由開州竄入豫省直撲衛輝經嚴樹森
派兵擊剿楊飛熊等統帶勁旅馳往迎擊勝保派兵赴豫助剿著
卽會同豫省兵勇將此股賊匪迅速埽除毋令延蔓見在豫省及
勝保所派兵勇爲數不少足敷剿辦勝保自可毋庸帶兵親赴直

隸交界督剿此時南捻出巢擾及曹單較諸河北情形更覺喫重若再令賊蹤竄入東省腹地致各郡土匪蜂起官軍將有應接不暇之勢北路大局關係非輕著勝保卽迅赴曹郡會合僧格林沁一軍將南捻悉力兜剿盡數殄滅永除巨患勝保務當與僧格林沁和衷商辦各濟時艱以副委任俟南捻殲除再行前赴潁阜將此由六百里諭令知之○諭聯捷奏東匪大股竄入豫境親督兵勇轉戰大獲勝仗一摺東匪擾及豫境橋廟等處經聯捷移防河之師力加剿洗該逆不得肆其蹂躪所辦尙屬妥善惟據勝保奏稱濮范巨捻劉占考投戈歸正當卽飭令薙髮分別犒賞各等語茲據聯捷奏稱劉占考等糾集東捻由亳范竄入豫境等語查十一月下旬劉占考正在就撫之時何以又糾東捻竄豫是否勝保所辦招撫事宜係屬不實不盡抑係聯捷所奏未能確實之處著

聯捷查明據實覆奏又據聯捷奏稱幫辦防河軍務段晴川因母病回籍省視見未在營等語段晴川係屬奏請幫辦之員責任甚重豈可來去自由段晴川係於何日回籍並是否實因母病離營抑或另有別情並著嚴樹森聯捷查奏將此由六百里各諭令知之○以萬啟琛署安徽按察使

由前任湖北糧道署

○壬戌欽奉

慈安皇

太后 慈禧皇太后懿旨恭親王之長女聰慧軼羣素爲

文宗

顯皇帝最所鍾愛屢欲撫養宮中晉封公主 聖意肫肫言猶在

耳自應仰體 先帝之心用沛 特恩著卽晉封爲固倫公主以

示優眷所有服色體制均著照固倫公主之例傳諭總管內務府

大臣知之○諭內閣吏部奏遵議嚴樹森處分等語前因河南已

革布政使邊浴禮玩誤廢事嚴樹森未能露章參奏降旨交部議處茲據吏部照例議以降一級調用河南巡撫嚴樹森著加恩改

爲降三級畱任○諭毛鴻賓奏粵逆竄擾會同被剿復竄黔陽芷江見飭各營兜剿並防剿情形一摺粵逆石達開由間道繞越楚境經各路兵團擊剿復經江忠義等軍擊退其來鳳一股原係石逆餘黨雖屢經擊卻而其間隘口紛歧誠恐與石逆大股糾合無論擾蜀擾楚稍一逞志則其勢日張亟宜湖北湖南兩省併力剿辦方足以遏賊鋒道員劉嶽昭一軍已由鄂省飭帶隨州得勝之師由施南進剿來鳳之賊著官文李續宜迅飭該員會合湖南各軍奮力進剿務將此股賊匪速就殲滅一俟楚境肅清卽飭該道率領所部前赴四川交駱秉章調遣湖南方以全力剿辦石逆大股龍山兵勇甚單毛鴻賓調赴桃源之總兵鄭陽和等軍著卽飭令相機速進會合北省之兵先將來鳳股匪蕩平以免石逆勾結石逆全股尙在沅江著江忠義督軍兜圍迅速殄滅毋令兇頑再

得免脫以除巨憝而免蔓延將此由六百里各諭令知之○諭馮子材魁玉奏逆匪分道犯鎮見籌防勦情形一摺江皖大股逆匪撲犯鎮江雖經馮子材派隊出擊小有斬擒而大股賊勢尙未挫敗鎮江爲南北咽喉關繫緊要見在兵力較少防勦兩不能敷該總兵等擬咨行揚州軍營撥兵援勦著都興阿迅速挑派勁旅遴委得力將弁管帶前赴鎮江協勦馮子材等務卽激勵將士會同揚營兵勇將城外屯聚賊壘悉數殲除江北防務及沿江水面一帶並著都興阿黃彬督飭水陸官兵一體嚴防毋令賊匪乘間竄渡將此由六百里各諭令知之○湖南巡撫毛鴻賓奏軍興以來東南數省因制兵不盡足恃不得不更議招募湖南首倡義旅各省踵而行之於是疆場之間勇多於兵湖南之勇又常居十之七八各省督撫習聞湖南勇丁之得力紛紛委員前來招募而於所

以得力之故未加詳察弊將不可勝言查湖南自前安徽撫臣江忠源辦理團練勒平雷再浩股匪後粵西賊起率以從征始有楚勇之名迨前雲貴督臣張亮基今四川督臣駱秉章先後撫楚虛已求賢知人善任適今兩江督臣曾國藩在籍奉旨幫辦團防日以忠義氣節激勸鄉人又得今太常寺卿左宗棠文武兼資之才從而贊助之官紳一體上下同心人思自奮其時募勇章程首以擇將爲主有將領而後有營官有營官而後有百長有百長而後有什長有什長而後有散勇逐加遴選遞相鈐制凡勇夫皆取具的保其姓名籍貫戶鄰團長逐一登注於冊按籍可稽在營則營官得而治之回籍則地方官得而治之是以無事能恪守營規有事能懷遵軍令並非貿然呼聚數百千人遂可驅之以策戰陣之功也至於帶勇之多寡又必因其人之才力爲等差用兵日久有

積功保至提鎮副將而實不能將千人者任之苟失其宜終必致於債事至遊手亡命之徒所在皆有殺人放火視爲故常投身入營則恃勢橫行莫敢誰何一人倡首眾人從而效尤一營壞規眾營俱難整飭非獨虞目前之潰決更恐滋異日之隱憂前准江蘇撫臣薛煥來咨委副將滕嗣林回楚募勇萬二千人臣察滕嗣林膽識才力殊非能統萬二千人之選止以江蘇軍務緊要未便禁其開招當卽諄飭慎選營官如無得力幫手與其多募以自累不如少募之足恃乃不數日卽據該副將稟報募足四千人剋期拔營臣遂加訪查始知滕嗣林在岳州招募不問來歷不看技藝不取保結但有自稱能募五百人者卽給予營官札委能募百人者卽給予百長札委苟圖充數不顧其他以有限之餉養無用之兵與不戰之勇豈不可惜且此等烏合之眾不能殺賊徒以擾民臣

札飭嚴加揀汰如再草率從事卽當咨明停止又准河南撫臣嚴樹森河南團練大臣毛昶熙來咨委已革副將周鳳山回楚募勇三千人臣知周鳳山向隨前湖南提臣塔齊布軍營升至副將迨塔齊布病故後周鳳山接統其眾一敗於樟樹鎮再敗於吉安三敗於進賢是其因人成事非獨當一面之才已可概見其在吉安時擅招遊勇異常騷擾經駱秉章胡林翼奏參革職此次奉委來南又於途中濫收守備劉江清爲差官劉江清包攬客貨經過岳卡不服盤查兇橫萬狀經臣將劉江清咨革交長沙府審辦以示懲儆伏思周鳳山前以招勇騷擾被參革職今勇尙未募而其差官倚勢兇橫滋擾局卡旣已如此若使成軍以出其騷擾當復何如嚴樹森等未知周鳳山之底蘊固宜採及虛聲臣洞悉其詳何敢稍存遷就已緘咨嚴樹森毛昶熙屬其不可爲周鳳山所誤此

外如浙江江西等省募勇之員接踵而來臣若概行禁止必將議爲畛域之區分而利害攸關要不能不權衡以期有濟大抵兵無強弱視將之強弱爲轉移求將之道當觀其深爲偏裨而膺統領或並其偏裨之所能者而亦失之識有短長才有大小未可一概論也抑臣更有慮者湖南兵勇援剿各省及畱防本省合計數十萬人以一省之才應天下之需勢必有所不給目前湖南農工兩途已覺事多人少招募不已其弊不使田野荒蕪不止古今人才原不擇地而生亟應各就各省按求幽隱鼓舞振興奇傑之士必有聞風而起者不必湖南之勇始能殺賊不必湖南之人盡能當勇也仰懇飭下直省督撫及各路統兵大員認真選將就地取材務在募一勇卽得一勇之力庶平時紀律嚴明不致虛糜糧餉他日事竣遣散亦免爲害地方湖南幸甚天下幸甚 上諭毛鴻賓

奏縷陳招勇流弊切中事情不爲無見已寄諭各督撫及各路統兵大臣認真選將就地取材不得專恃楚勇致滋流弊嗣後各省如有前赴湖南募勇之員著毛鴻賓隨時察看酌量妥辦至湖北之勇向稱勇敢善戰各軍營如前赴該省募勇亦諭令照此辦理其所募之勇仍著按照湖南章程挑選並不准以游手無藉之人濫竽充數至所稱已革副將周鳳山各節已諭嚴樹森毛昶熙查辦矣將此由六百里諭令知之○諭毛鴻賓奏縷陳招勇流弊所奏均屬可採用兵之道擇將爲先求將之道當量其識之短長才之大小以爲器使且該督撫及統兵將帥誠能虛心採訪何地無才不必湖南之人始能充勇湖南之勇始能殺賊嗣後各直省督撫及各路統兵大臣務當認真選將就地取材各就各省按照湖南募勇章程妥爲辦理其所派募勇之將領尤須酌量該員才具

果能帶勇若干方令其募勇若干庶因材器使不至統率無方至所募之勇籍貫來歷尤應認真嚴查不得以游手之人濫竽充數尤不得上下相隔竟至將與勇兩不相識一旦有警賊匪得以混入勇中無從覺察以致貽誤事機湖南湖北所募之勇在各軍營率多勇敢善戰各省如有前赴湘鄂募勇之員並著知會該二省督撫隨時察看如有前項弊端卽行參辦將此由六百里各諭令知之○議政王等議上京旗各營練兵章程從之○命江甯副都統魁玉幫同甘肅西甯總兵官馮子材辦理鎮江軍務○癸亥諭內閣御史任兆堅奏大臣伏法情罪未明請旨昭雪一摺科場條例至爲慎重如果主司舞弊行私自應明正典刑但亦當賊證明確罪當情真方成信讞若如所奏柏棧一案全由載垣等深文周內置柏棧於重典藉以盜竊政柄若日久不予昭雪何以持刑憲

之平此案卽著禮刑兩部會同將原案悉心確查秉公詳議具奏

○僧格林沁西凌阿國瑞奏臣僧格林沁臣西凌阿駐紮曹州府

東南大屯地方探得南路相距二十餘里尙有大股會匪盤踞正

擬督軍進剿十二月初一日臣國瑞督領翼長舒通額馬隊到營

值大股馬步賊匪列仗來撲距營較近臣西凌阿臣國瑞卽帶領

馬隊迎剿行至張家塘地方該逆馬步約六七千人直前撲犯我

軍奮勇進擊賊遂敗退官軍追殺三十餘里殲賊四五千名並斃

賊目數名初三日探得曹縣馬家集係逆首焦桂涓老巢卽日移

營進剿甫至馬家集南捻劉添詳等帶領馬步賊萬餘前來援應

曹屬捻匪已至袁家圍李家集盤踞臣國瑞遂帶步隊礮位攻剿

馬家集賊巢臣西凌阿先帶馬隊前往袁家圍進剿臣僧格林沁

亦帶馬隊策應該逆列隊北來眾約一萬餘人臣西凌阿指揮馬

隊包鈔該逆拌死迎拒因我馬隊奮擊賊卽潰敗殲斃甚多該逆有竄入袁家園藏匿者有向西南兩路竄逃者其西竄之賊經翼長舒通額等帶領馬隊追剿南竄之賊經副管恆齡帶隊追剿臣等督領營總富和蘇克金接殺袁家園及附近各村隱匿賊匪一千餘名救出難民五百餘名分路追殺二十餘里共斃賊三千餘名據難民供稱大小擒首已被我軍殺斃十餘人並稱黑旗李加膺等股尙有接踵前來之信臣國瑞復督步隊礮位進攻馬集賊圍圍內賊匪偪脅居民死守我軍開放大礮擊斃多名旋據難民報稱賊匪全向南竄見在圍內俱係良民臣西凌阿國瑞各帶馬步隊伍追剿賊蹤已遠因魏灣地方尙有賊首董執信聚集大股盤踞各處敗匪均歸該處合夥是以撤隊暫緩追擊以便剿辦魏灣之賊至臣僧格林沁前奏俟曹屬蕩平酌量移紮東昌查東昌

之陽穀壽張范縣經臣國瑞勦撫兼施見無賊蹤曹屬會匪眾多賊圍林立雖經疊獲勝仗尙未能一律肅清況南捻經此次懲創後股是否續來殊難豫定如全軍撤駐東昌恐曹屬會匪潛滋皖捻復行思逞兵力不克兼顧臣僧格林沁暫難移紮東昌惟軍情隨時變更儻屆期或可分兵再行具奏至譚廷襄能否駐紮東昌應請旨令該撫臣酌量緩急奏明辦理上諭僧格林沁等奏勦辦曹屬匪眾並迎勦皖捻連獲勝仗一摺辦理甚爲得手著該大臣仍督飭國瑞等軍實力接捕以清餘孽○諭議政王軍機大臣等前因有人疊次參奏候補運司金安清種種貪黷藉捐殃民各款當經諭令曾國藩查明嚴參茲又有人奏金安清白選授湖北糧道後規避延不赴任遂於皖北軍營倡爲捐餉減成之說赴浙江各處指捐皖省紳富之在浙者以數十萬計解營不過十之一

二請飭赴袁甲三軍營清算捐款等語金安清藉捐肥已擾累閭閻本係貧劣之員薛煥等徇情奏請遂充總辦南北兩臺籌餉委員該員藉作威福以致民怨沸騰當此小民蕩析離居豈容此等貪吏肆其剝削著吳棠揀派妥員接辦南北兩臺糧餉並勒令該員迅赴袁甲三軍營將前次捐款覈算清楚儻再有意遷延不肯赴皖卽著吳棠派員押解前往以重軍餉該員經手江北捐款著吳棠查明如有虧短侵那不符等弊卽一面嚴參從重治罪一面將該員本籍及寓所杭湖上海寄頓貲財先行嚴密查鈔備抵該署督受朕特達之知諒不敢存官官相護之心稍爲徇隱致爲人受累也金安清赴臨淮軍營袁甲三卽督飭覈實銷算不准稍有瞻徇將此由六百里各諭令知之○翁同書奏臣屢次催飭苗沛霖傳令一律薙髮並須由臣親驗虛實適聞楚師將至苗沛霖頗

懷疑忌頗萌觀望十月二十二日臣乘舟行至下蔡苗沛霖來謁
臣詰以因何不傳令薙髮苗練枝梧掩飾臣責以大義該練理屈
辭窮據稱一兩日內卽令淮南壽州正陽一概薙髮等語究竟有
無把握未敢深信並聞苗沛霖向人傳說擒匪於明年正月十六
日出巢不可不備理合附片密陳 上諭僧格林沁奏稱東昌陽
穀等處見無賊蹤曹屬會匪尙未一律肅清南捻是否續來殊難
豫定儻全軍撤駐東昌恐兵力不能兼顧等語自屬實在情形著
該大臣等仍遵前旨會合勝保先將曹南股匪悉力殄除又據翁
同書奏稱聞苗沛霖向人傳說擒匪於明年正月十六日出巢等
語該匪四出竄擾往往先爲揚言自應豫籌堵剿著僧格林沁勝
保文煜譚廷襄嚴樹森毛昶熙妥爲籌備督飭各軍並各要隘文
武員弁探蹤迎擊總須以剿爲防爲先發制人之計擣穴擒渠盡

戮醜類方爲一勞永逸切不可有此疆彼界之分以追賊出境自了門面致蹈從前積習將此由六百里各諭令知之○袁甲三奏據遊擊張景春守備胡占魁稟稱十一月十八日由閒道至定遠之南練總守備吳開會圩復與吳開會赴廬境青龍廠把總褚開泰圩內詢知從前粵逆攻陷廬郡附近居民均被迫脅內有吳殿元吳永璧本係良民不得已而受賊僞職常與良民暗通信息屢欲投官苦於四面賊氛難以自拔當定遠捻首張落刊出竄時粵逆僞玲天福高意城於前一日入城接守吳殿元等察知有機可乘一面帶眾進城佯爲助守一面密致褚開泰約期進攻願爲內應等語臣素知吳殿元等並非甘心從賊是以親錄手諭派令張景春胡占魁馳往與褚開泰等將吳殿元吳永璧招至該圩當面開導吳殿元等感激涕零願效死力約定日期復潛入定城張景

春趕回報信事機至緊未便稍遲而一切操縱機宜必須隨時審度有無變更實難豫定當飭臣子編修袁保恆由長淮衛回營會同建甯鎮總兵張得勝統帶馬步兵勇三千人李世忠亦派守備李丕倬同胡占魁管帶千餘人冒雪前往並調副都統克蒙額等由北路趕回策應二十三日我軍行抵距定三十里之婁王楊各圩調集附近團練銜枚疾走於三更後直抵城下開放槍礮該逆正在糾眾守禦吳殿元等乘勢恐嚇告以官兵勢盛萬難抵敵高意城亦情願納款我軍見東門火起知係內應舉發當飭南路各圩豫備截殺一面直趨東關奮力攻擊守城之賊紛紛逃竄東門大開我兵乘勢擁入高意城首先出城其所帶賊黨猶有巷戰力拒者均被殺斃餘賊盡向南門竄去又經南路張橋集江家巷各民圩沿途攔殺屍橫徧野連凍斃淹斃約計不止千餘人殘敗之

匪奔赴梁園店埠向廬郡而去定遠縣城於二十四日卯刻克復
袁保恆等入城安撫並由臣飭令藩司遴委地方官辦理一切善
後查定遠爲九省通衢自粵捻竄踞以來南北聲息不通已歷三
年前聞張落刑西竄立派馬隊追剿以冀復我堅城乃已爲粵逆
所踞若曠日持久該逆根蒂旣固則與廬巢爲犄角剿辦更覺費
手今幸吳殿元等被脅不甘密爲內應我軍於風雪嚴寒之中糾
約團練乘夜趕到四路環逼克復堅城從此可冀會合楚師共圖
掃蕩實爲皖北軍務一大轉機上諭定遠爲廬郡門戶此次袁
甲三密約內應並令袁保恆等乘夜督帶兵練克復堅城調度有
方深堪嘉尙卽著撥兵駐守嚴密布置並探明楚師駐紮處所妥
爲聯絡以期進取廬州至逆首高意城隨吳殿元等一併投誠經
袁保恆許以獎勵並令暫緩薙髮仍回南路串通各圩於廬郡相

機行事該編修所籌自必確有把握卽著妥爲辦理儻能迅克廬
州肅清皖北必將出力人員論功行賞破格酬庸另片奏苗沛霖
請將淮南各圩先行薙髮有無翻悔尙未可定等語本日翁同書
片奏亦稱舟過下蔡面晤苗沛霖直言訶斥苗沛霖理屈詞窮有
一兩日內卽令淮南各練一律薙髮之說苗沛霖性情陰鷙且危
不自安所稱薙髮一節似難憑信見在定遠已復與楚營消息相
通旣經袁甲三派副將徐鵠馳往楚軍營中密商一切俟彭玉麟
復函到後如可兩軍會合卽行迅速夾擊並設法招撫各練圩總
期計出萬全共殲巨寇務使皖省一律肅清永除後患將此由六
百里諭令知之○免廓爾喀明年貢表方物○添設山西粟城鎮
東陽東灘三營南溝材西哄雲頭黃澤松煙五汛遊擊都司各一
守備三千總二把總七外委十五兵三千六百名改設潞澤澤州

遼州三營副將參將都司各一改平定州鳳臺縣兩汛爲營移設
守備二裁潞澤等營原設參將以下四十一缺兵三千名太原鎮
兵六百名○甲子以部院八旗等衙門遵旨議覆事件遲延命所
司認真稽察並嚴定期限○諭各衙門詳定新纂刪增各例舊案
歧出者概毀銷○乙丑諭議政王軍機大臣等據彭玉麟奏懇陳
下情不諳地方公事請開缺專意剿賊一摺彭玉麟管帶水師屢
著戰功由諸生蒙 文宗顯皇帝疊加超擢經朕簡任安徽巡撫
原以安徽全省糜爛之餘吏治兵事非得賢員莫能整頓故量才
擢用畀任封疆茲覽所奏懇陳十載戎行於水師稍諳駕駛而刑
名錢穀皆非所知深恐於地方公事或有貽誤籲請開缺仍帶水
師一意辦賊本日已諭令彭玉麟仍酌帶兵勇赴安徽接印任事
一俟斟酌有人可以接替再行降旨准令開缺專辦軍務彭玉麟

隨同曾國藩出兵最久知之必深是否該撫實係不習吏事於安徽巡撫能否勝任著曾國藩據實迅速馳奏並著於所屬司道大員內擇其長於吏治熟悉軍情者不必拘定資格秉公保奏一二員候旨簡放將此由六百里諭令知之○諭彭玉麟奏懇陳下情請開缺仍專辦剿賊一摺所陳向帶水師不習吏事封疆任重深恐貽誤請開缺以督帶水師一意辦賊具見真實不欺不染近來官場沽名釣譽之習深堪嘉許惟安徽全省糜爛粵捻紛乘苗沛霖陰謀叵測意在肆擾皖豫乘隙北犯軍情亦萬分緊急是前授彭玉麟爲皖撫仍以督辦軍務爲重係屬用其所長彭玉麟著仍酌帶兵勇前赴安徽接印任事並仍遵前旨繞赴淮北會商袁甲三李世忠等撥兵接應迅遏苗練逆氛一俟斟酌有人准令該撫開缺專辦軍務此時仍當竭力籌辦斷不可存五日京兆之心以

慰厯念將此由六百里諭令知之○諭官文李續宜奏豫省捻匪竄圍棗陽縣城撥兵援剿情形一摺捻首王懷義等分爲二股一竄賒旗鎮欲擾襄樊一由唐縣至棗陽城外四面圍撲官文等已派候選知府毛有銘督率所部並咨副都統舒保撥兵馳赴棗陽隨州剿辦著卽飭令統兵將弁會同豫省官兵奮力夾擊毋稍遷延該匪蹤迹飄忽此剿彼竄是其慣技嚴樹森務須另派得力將弁迅督兵勇越境追剿會合楚軍夾擊以期一鼓殲除毋以驅逐出境卽爲了事將此由六百里各諭令知之○李續宜奏欽奉諭旨飭臣將苗練是否可撫如必須剿辦楚軍能否分撥助剿妥籌覆奏臣愚以爲得民之心必助順而後逆燄可息用兵之道必能剿而後撫局可成當苗沛霖謀叛之初附近各圩豈無深明大義之士忠憤鬱結思與苗逆爲難而隱忍不發亦謂髮捻未平故不

敢顯與之抗耳而苗沛霖恃此以爲得計詭謀日密裏脅日多迫羽翼已成遂致陰受粵逆僞職陽假報讎爲名使我壽州名城卒爲所陷前據壽州六安官紳稟報述其淫劫慘殺人人切齒願以殺苗自任詎苗逆入城後仍復詭言求撫推其意無非因城守未定以緩我師也不料翁同書爲其所制從而信之近閱探報該逆有儲積米糧徧布黨與倡勸民團並暗襲蒙城潁州之信伏念順逆之理不可不明勦撫之機不可不定臣部前派援壽之師已至霍山並飭道員蔣凝學一軍馳駐六安培城濬濠藉爲牽制該逆頗知顧忌未遽猖獗雖一時兵力甚單不敷勦辦而見據蔣凝學等密稟壽州公正紳民多願齊團自效卽脅從之家懾我軍威亦有戴罪圖功之意際此人心效順激勵而拊循之如果因利乘便得以殲厥渠魁固屬朝廷之福卽使刻難殄滅而人人思奮苗勢

必孤除惡亦當不遠非然者壽城旣陷我仍墮其術中恐自此蠶食鯨吞異日之患更有甚於髮捻各逆者矣臣原擬駐紮楚皖交界地方惟川匪滋擾來鳳豫捻窺伺棗陽隨州孝感等處籌勦籌防應接不暇若臣遠離省垣必致鞭長莫及容俟鄂省軍務肅清再行馳紮楚皖交界地方督辦軍務上諭苗沛霖自攻破壽城後仍以詭辭求撫因其居心叵測業經屢次諭令彭玉麟帶兵赴任妥籌勦辦並諭令袁甲三將附近苗練各圩設法解散一俟彭玉麟馳抵潁壽即可督兵會勦該逆果知震懾就我範圍亦無難相機辦理茲據李續宜奏必能勦而後撫局可成等語於見在籌辦情形適相符合該撫見飭道員蔣凝學一軍駐紮六安該逆頗知顧忌其壽州紳民旣願齊團自效卽脅從之眾亦思戴罪圖功是人心效順極爲可用卽著李續宜飭令蔣凝學將該紳民等加

意拊循其被脅民人亦務曉以大義使其樂爲我用一俟袁甲三等進兵即可會合攻剿其餘援壽各軍應否催令由霍山前進楚省能否添調兵勇均著李續宜悉心酌辦該撫因軍務喫緊未能遠離鄂省著俟辦理得手仍卽馳赴楚皖交界力籌兼顧將此由六百里諭令知之○諭慶端等奏平陽會匪竄陷福鼎北路喫緊一摺福甯爲省垣北路門戶該匪見竄福鼎之白琳地方距福甯府城不遠且恐溫虎各匪水陸並犯省垣亦岌岌可慮亟應妥籌兼顧以防滋蔓總兵秦如虎等馳赴福甯卽責令將福鼎一城剋期攻拔毋令該匪深入浙省係該督兼轄省分毋得株守省垣藉口防務置浙事於不問所稱令副將吳鴻源督帶兵勇航海馳赴紹興府屬之曹娥江劃江而守保衛甯波是該督尙未知甯波失守之信見在是否可行須令相機辦理且所派兵勇人數過單亦

恐不能得力仍著添調勁旅責令進攻以牽賊勢該督務當內顧
省防外援鄰省不得顧此失彼稍有疏虞將此由六百里諭令知
之○丙寅命吳棠揀兵分布蔣壩等處以防粵逆並命駐清江擇
要立營毋令捻匪竄渡○丁卯曾國藩奏臣奉命節制浙江全省
軍務所有江蘇安徽江西浙江巡撫提鎮以下各官悉歸節制伏
念臣自受任兩江以來徽州失守祁門被困竭蹶之狀屢見奏報
幸託 聖主威福僅得自全至於安慶之克悉賴鄂軍之功胡林
翼籌畫於前多隆阿苦戰於後並非臣所能爲力江蘇各郡羣盜
如毛乃臣職分應辦之事受命年餘尙無一兵一卒達於蘇境是
臣於皖則無功可敘於蘇則負疚良深乃蒙 皇上天恩不責臣
以無效翻令兼統浙江軍務並四省巡撫提鎮以下悉歸節制此
非常之寵遇臣自顧菲材實難勝任自九月以來浙省軍情日見

危急臣與毓科左宗棠等往復函商援救徒以地段太寬兵力太薄既須援浙又須顧皖保江三省有並重之勢一時乏兼全之策直至十月下旬始定議左宗棠由衢州援浙從正路以張軍威鮑超由甯國進兵從旁路以制賊勢大局所繫必應統籌臣本未敢推諉不必有節制浙省之名而後盡心於浙事也前奉諭旨令浙省提鎮以下均歸左宗棠節制臣已咨催左宗棠迅速起行但以臣遙制浙軍尙隔於千里之外不若以左宗棠專辦浙事可決於呼吸之間左宗棠前在湖南撫臣駱秉章幕中贊助軍謀兼顧數省其才實可獨當一面應請 皇上明降諭旨令左宗棠督辦浙江全省軍務所有該省主客各軍均歸節制毋庸臣兼統浙省額懇 天恩收回成命在朝廷不必輕假非常之權在臣亦得以少安愚拙之分其浙省軍事凡臣思慮所能到才力所能及必與左

宗棠竭誠合謀不敢稍存畛域如因推諉而貽誤卽求 皇上按
律治罪 臣忝任江督三省巡撫提鎮以下各官例得節制載之會
典著之敕書各文武亦皆恪遵憲章不必更加申誡至袁甲三都
興阿各路軍情謹當隨時商辦其江北皖北地方文武 臣已嚴飭
仍歸該大臣等節制不得稍涉玩視 臣惟當與各僚屬同心圖治
共濟艱難伏懇 皇上俯鑒愚忱允 臣所請不勝感激悚懼之至
又奏江蘇浙江地方軍務關係甚重欽奉諭旨飭 臣酌保堪勝封
疆將帥人員 臣查蘇浙兩省羣賊縱橫安危利鈍繫於巡撫浙江
巡撫王有齡久受客兵挾制難期振作欲擇接任之人自以左宗
棠爲最惟此時杭州尙在圍困之際必須王有齡堅守於內左宗
棠救援於外應俟事勢稍定乃可更動伏求 聖主權衡時勢再
降諭旨至江蘇巡撫一缺目下實無手握重兵之人可勝此任查

有福建延建邵道遺缺道員李鴻章安徽合肥人咸豐三年正月在編修任內奉旨派同前工部侍郎呂賢基回皖辦理國防在皖北軍營六年歷著戰功八年冬閒調赴臣營隨臣周歷江西鄂皖三省十年七月初三日臣於保帶淮揚水師案內奏稱李鴻章勁氣內斂才大心細與沈葆楨二人並堪膺封疆之寄旋因祁門危急仍畱臣營未赴揚州該員見在臣營統帶淮揚水師五千人戰船二百號與總兵黃翼升會同辦理安慶之克無爲運漕之捷該水軍出力爲多若蒙 聖恩將李鴻章擢署江蘇巡撫該員見統水軍五千臣再撥給陸軍六七千便可馳赴下游保衛一方地方一切事宜該員亦能洞悉利弊至巡撫駐紮之地上海僻在東隅不足以資控制臣愚以爲宜駐紮鎮江北可聯絡淮揚南可規復蘇常近拊金陵之背遠制洋面但派勁兵數千保衛上海畱司道

一二員經收關稅不必巡撫常駐滬城如蒙俞允應請密諭飭下
李鴻章料理赴任待該員軍抵鎮江後再求明降諭旨至堪勝將
帥者臣意中實乏其選臣處所統諸將屢見奏報久邀 聖明洞
鑒惟綏靖鎮總兵鮑超本年正月破黃汶金大股於洋塘五月破
劉瑄林大股於赤岡嶺均屬非常戰績七八兩月馳驅二千餘里
克城破敵肅清江西全省厥功尤偉鮑超與李續宜多隆阿勳名
相等該鎮見進兵甯國關繫極重可否仰沐 特恩獎勵抑或俟
諸異日出自 聖裁又奏臣欽奉諭旨飭查浙江撫臣王有齡江
蘇巡撫薛煥候補鹽運使金安清被參各款臣查王有齡前任蘇
藩其籌餉之才爲遠近所推許上年升任浙撫適值金陵師潰蘇
常並陷之時敗將逃兵萃於浙省以萬難整馭之卒又素無統轄
之權時勢之艱亦爲遠近所共諒然使另練親兵裁汰疲卒亦未

始不可以主而制客轉弱而爲強王有齡不諳軍情但求速效整
理尙未就緒卽催令進圍嘉興且言嘉郡卽日可克臣於去夏頗
以爲慮曾奏明嘉興師疲恐生他變厥後嘉興果敗王有齡不能
嚴參以治罪嚴州賊退又復冒奏以飾功於是將玩兵刃遂不可
制至本年金華之失蘭谿之陷兵團仇殺弁勇擄掠均不能究諭
旨所詢動受張玉良等挾制係屬實在情形今則賊氛環逼餉項
久虧卽使杭省幸全數萬敗軍亦斷非王有齡所能管轄自去夏
以來浙餉月需三十餘萬大率取之甯波紹興紳民輸將非不盡
力乃王有齡奏參團練大臣邵燦立予罷黜其下委紳數人皆革
職永不敘用其所參者並非軍旅之大端但爭體制之末節以致
甯紹眾紳各懷憤恨外間相傳有杭兵不許守紹紹餉不准入杭
之說馴至紹郡淪陷杭省圍困皆由官紳水火之所致諭旨所詢

輿論譁然者或由於此近年蘇浙官場陋習以夤緣鑽刺爲能以巧猾譎詐爲才王有齡起自佐雜微員厯居兩省權勢之地往年曾帶浙員赴蘇去年又帶蘇員赴浙袒庇私黨多據要津其委員派捐但勒限以成數不復問所從來委員藉公肥私朘削斂怨勢所不免諭旨所詢屬吏多貪鄙之徒但以掊克夤緣爲事證以臣之所聞殆非無因江蘇巡撫薛煥前在蘇州府任內頗著循聲在上海道任內辦理關稅及外國事宜亦臻妥協及擢任巡撫駐紮上海陸續募勇四萬餘人每月糜餉二十餘萬不能專辦一路之賊江蘇所存地方惟鎮江揚州兩處尙據形勢該撫未嘗親至兩郡一行又不能多濟餉項以聯聲援上年夏間薛煥奏請通飭各路禁用廣勇而該撫之信任曾秉忠馮日坤等所部多係廣勇曾秉忠之勇搶劫洋船釀成巨案馮日坤之勇在金山圍殺紳首團

勇多名目無法紀薛煥莫可如何滬城紳民既畏賊蹤之環逼又虞兵勇之肆掠日夕驚惶不獲安處諭旨所詢帶勇非其所長株守上海莫展一籌三十里外卽有賊壘等語臣之所聞大約相符自蘇常失陷各縣鎮市流離轉徙萃於上海一隅人民財貨中外商賈文武員弁肩摩轂擊地少官多人浮於事每有差委多由營求而得或並無可派之差亦謀爲位置之法輒復添一捐目給一委札其官職較大者如奏派金安清總辦餉局奏免前藩司蔡映斗首府吳雲失守罪名且委吳雲總辦捐局此數人素工應酬不愜人望其所援引之人類多夤緣之輩諭旨所詢官吏奔競如常殆卽此類也上海旣繁盛異常蘇州之書籍字畫自賊中販賣而出亦充積市肆之中薛煥設立書畫局多延畫工購買名蹟諭旨所詢日享安富娛情古玩者亦與臣所聞相同此外別無所聞丁

憂候補鹽運使金安清聰明過人好覽古籍惟矜術智術專工揣摩其辦事廣設方略終鮮成效前因勸捐軍餉款目未清經袁甲三奏參赴皖覈算展轉營求始得奏派南北籌餉道通海設局大開募府煊赫奢侈令人向伊捐資投效方得差委爭相賄賂委員生監各至百數四出需索民不聊生胥役人夫相望於道或派捐富戶關說餽賄即可免捐或挾嫌誣指一經傳押必致破家以上三員惟金安清才略頗優而物議最劣應請旨卽行革職撤去籌餉差事不准仍畱蘇境以靖人心而息浮言王有齡辦理杭城防務尙費苦心惟用人或尙巧猾取財間有怨言薛煥儉安一隅物論繁滋蘇浙財賦之區賊氛正熾該二員似均不能勝此重任應否降革之處出自 聖主鴻裁 上諭內閣曾國藩奉遵查監司大員劣款等語丁憂候補鹽運使金安清藉捐肥己聲名甚劣著

先行革職仍著吳棠派員押赴袁甲三軍營覈算款項毋任延宕
○諭議政王軍機大臣等曾國藩奏接奉節制江浙等四省軍務
諭旨瀝情懇辭並遵查江浙撫臣參款酌保人員聽候簡用各摺
片前因軍情喫緊特諭曾國藩統轄節制以期事權統一可以通
籌全局茲據該大臣謂遙制浙軍不若以左宗棠專辦浙事請收
回成命各等語謙卑遜順具見悃忱真摯有古大臣之風深堪嘉
尚惟左宗棠業經降旨令其督辦浙江軍務並准其自行奏事江
浙軍情本屬相關一氣凡該大臣思慮所到諒無不協力同心相
資爲理節制一事其勿再固辭杭州自甯紹疊陷孤城圍困已歷
數旬本日又據薛煥奏接王有齡遣勇泗水遞到蠅頭帛書具稱
城中民食罄盡餓斃者已三萬餘人兵糧亦已垂竭左宗棠一軍
務卽星速馳援總期早到一日俾杭省早得一日之救危而得全

曾國藩遵查王有齡各款持論平允惟王有齡困於危城左宗棠
尙須赴救一時驟難更換鮑超之軍仍著迅攻甯國以牽賊勢薛
煥被參各款亦經該大臣查明得實上海係僻處一隅該大臣所
籌蘇撫應於鎮江駐紮之處於地勢軍情極得要領李鴻章既據
察看其才可勝重寄著照所擬卽飭統帶水軍並再撥給陸軍六
七千馳赴下游誠如所奏北可聯絡淮揚南可規復蘇常拊金陵
之背與該大臣搯吭之師相爲策應實中機宜薛煥見在辦理通
商等事一俟可以移交再降諭旨或令其專辦外國事宜分別交
替李鴻章到鎮後並著將鎮江一帶水師戰船是否得力兩淮鹽
務見應如何整頓及該運司等能否得力之處一併查明由該大
臣妥籌具奏至金安清種種劣蹟已明降諭旨革職蔡映斗吳雲
失守罪名據稱均由薛煥奏免不愜人望並著該大臣查明參辦

將此由六百里諭令知之○曾國藩奏臣疊奉諭旨飭令保舉人才茲又欽奉諭旨令保封疆將帥臣自愧無知人之明無儲才之素不足仰答聖懷惟經濟以歷練而成人才以獎借而出苟有所聞卽當搜羅薦達造就爲他日之用去年常州之陷守土官吏皆去該郡士民尙能嬰城固守與賊鏖戰多日城破之後各村鎮團練拒賊如無錫蕩口等鎮至今尙與賊相持不懈是其中必有二三賢智爲之倡率臣聞該郡素尙節義其士子多好讀書稽古研究事理臣所知者有候選同知劉翰清監生趙烈文博覽羣書畱心時事監生方駿謨不求聞達行誼卓然監生華蘅芳從九品徐壽研精器數博涉多通此數人者若令閱歷戎行廓其聞見必可有裨軍謀蔚爲時望劉翰清在山東方駿謨在河南其餘尙在木籍應請飭下各省撫臣訪求咨送臣營俟到營數月後悉心察

看再行出具考語奏請 聖主量材錄用 上諭前因東南軍務需才孔亟以曾國藩久歷戎行見聞較廣諭令該大臣擇其堪勝封疆將帥之任者酌保數員以備錄用茲據奏稱經濟以歷練而成人材以獎借而出去年常州之陷該郡士民尙能與賊相持如候選同知劉翰清監生趙烈文方駿謨華蘅芳議敘從九品徐壽等使之閱歷戎行廓其聞見必可有裨軍謀等語著譚廷襄嚴樹森左宗棠薛煥卽將各該員速行訪求咨送曾國藩軍營俾該大臣悉心察看是否均堪造就由該大臣分別酌量奏請錄用○諭薛煥奏接得浙江撫臣專勇齋到帛書據情代奏一摺自聞甯波陷失之後日盼杭州軍報瞬息又將旬日本日始據薛煥奏稱此時滬浙僅有由澈浦鼃子壘一綫之路可冀通信而海道往還動虞阻滯茲接得王有齡寄到帛書杭城四面被圍江路阻絕城中

民食接括已盡兵米亦將告罄該撫在城樓督戰已經五十餘日
誓與官民死守所有准撥之廣東江西湖南湖北每月協餉無從
催取屬由薛煥奏請於中外商人運赴各省貨物過滬時匯繳應
納之稅給發收單執赴各該省抵稅扣收協餉卽將所收銀兩由
滬隨時購辦米石源源接濟餘銀解杭充餉以救貼危各等語情
形自屬萬分危急業由薛煥督同上海關道與眾商民籌辦著官
文李續宜毛鴻賓勞崇光耆齡等遵照如有各商由滬運貨到來
者執持上海此項稅單卽行照數抵充浙省軍餉以資接濟如有
海道及他路可通浙省均著各該督撫等盡心籌畫各將應解浙
省月餉分途接運以濟然眉浙省危亡呼吸之餘務期協餉早到
一日早得一日接濟並將籌辦情形迅速先行具奏以慰懸厪原
摺著鈔給閱看將此由六百里加緊各諭令知之○諭慶端奏浙

省賊氛徧地杭垣被圍請飭催鮑超援浙一摺前因浙省危急疊經諭令慶端馳赴浙閩交界地方相機督剿以爲援應該督自九月間已有統兵入浙之請至今已逾兩月尙未離閩一步且未知甯波失守之信本日據薛煥馳奏杭郡被圍待援情形幾至目不忍觀該督尙以防務緊要等詞粉飾延宕當此軍務喫緊該督有兼轄浙省之責如此怛怯無能豈勝兼圻之任著傳旨嚴行申飭所有臺灣兵勇是否已飭令由海道援浙所稱添調兵勇由廈門福州航海馳援是否已飭前往該督接奉前次諭旨已否起程馳赴閩浙交界將來左宗棠抵浙得勝賊恐由金衢上竄閩省門戶必應嚴防該督馳赴閩浙交界援浙卽以防閩其福鼎城池失陷卽飭秦如虎等迅圖克復毋致顧此失彼該督總當以實心辦事如仍蹈從前虛假惡習遷延不肯出省設杭城再有疏虞朕惟該

督是問決不寬貸將此由六百里諭令知之○諭薛煥奏接得浙江撫臣專勇泐遞帛書一招浙江省城被賊圍困危迫情形至於此極昨據留國藩奏已令左宗棠一軍赴援杭城一時尙難卽達卽使所向無前而杭城呼吸存亡之際非由滬濱速籌運濟他路更屬緩不濟急仍著薛煥迅籌運濟前由火輪船載運軍火銀錢飄至甯波內洋後能否收泊澈浦該委員有無飾詞須確切查明其疊次籌解米糧等件各船與守備張大剛管帶礮船曾否駛到陸續運入杭城此外有無另籌運送糧餉可期速達之處仍著薛煥竭力迅速籌辦務使堅城早得接濟毋令餓斃以待援師滬浙相依唇齒此時杭州萬緊惟恃滬濱一途運濟儻因接濟不及竟致失事惟薛煥是問近日浙省軍情又復何如仍著確探迅速馳奏以慰懸厪將此由六百里加緊諭令知之○諭譚廷襄奏南捻

屯聚曹縣魏灣一帶偏臨河岸未知所向請飭直豫兩省加意嚴防等語僧格林沁前奏魏灣地方有大股賊匪盤踞擬卽進剿等語見在該處捻蹤麇聚與僧格林沁大營相距甚近而本境賊圍林立著卽督飭兵勇節節接剿毋令紛竄勝保軍在河西應由何路進兵曹屬俾得兩路夾攻卽著迅速籌商並著文煜嚴樹森嚴飭所屬認真堵剿譚廷襄見駐東昌亦宜一體嚴防至竄擾河北股匪經嚴樹森派副將楊飛熊等迎頭截剿勝保亦派兵勇跟追如該匪擊退回竄直東邊界該大臣等務當合兵夾擊務使東昌曹州兩郡之匪盡拔根株庶進擣捻巢不至有回顧之慮該大臣等必能和衷共濟迅奏膚功也將此由六百里各諭令知之○諭賈臻奏巨捻回竄粵逆意圖夾淮北擾請飭勝保南下各摺片勝保前次屢請馳赴皖省辦理苗練剿撫事宜因北路未經肅清諭

令暫緩南下茲據賈臻奏稱潘闔等屢探勝保南下消息自因素受該大臣恩誼樂爲之用惟賈臻所請調六安防兵見有提督成大吉等統帶未可分調北路兵勇前已據該大臣飭令成祿等先後撥兵三千名馳赴潁州當此曹州等處教會各匪尙未全就肅清亦未可再行抽調豫省剿匪事宜嚴樹森自任甚力該省兵勇本不甚多該大臣不可抽調卽或將來該大臣南下亦不必分任豫省事務致該撫得以藉口諉卸皖省見既有潁營原存兵勇並成祿帶赴之兵自可督同潘闔等練眾相機辦理粵逆及苗練事宜其餉需一節並有賈臻力任諒必確有把握不至以空言欺飾使該大臣到皖後諸多掣肘此事不止關繫該大臣一身務須謀定後動不可輕於一試賈臻所言是否真確著勝保酌量情形迅速具奏如果可以單騎南下潘闔等聞風思奮亦屬真情但許其

率馬步前迎必致驚擾豫省良民潘閻等既服從勝保當必聽其調遣卽著豫行阻止不許率眾前迎粵逆陳玉城前在鎮江白兔地方屯踞何以此次賈臻奏稱該逆又在廬州且在廬定聚眾二千餘萬連營七十餘座袁甲三等從未奏及卽賈臻前此亦無一字馳報如有此等大股賊匪豈可任其四竄著袁甲三商同彭玉麟迅卽繞由潁郡進剿以杜北竄原摺片著鈔給閱看將此由六百里加緊各諭令知之○戊辰 上詣 天穹寶殿祈雪○己巳恭上 孝德皇后 尊諡曰 孝德溫惠誠順慈莊恭天贊聖顯皇后○諭內閣刑部都察院奏審已革大員黃緣奔競並辦理軍需蒙混奏銷各情按律定擬一摺已革兵部侍郎慶英因前在葉爾羌辦理捐輸鈔產蒙混銷算之案部議擬以降二級調用輒敢向承辦司員豫索奏底攜帶金錢赴恭親王府面呈意圖行賄乞

恩實屬卑污不職其辦理捐輸鈔產案內亦復有心蒙混慶英著照所擬從重發往新疆效力贖罪所有奏銷不符之銀著勒令如數賠繳俟完贖後卽行發遣兵部承辦司員於慶英例應回避之案輒行呈送奏底亦有不合著查取職名交部照例議處○諭前因有人奏請蠲免東豫兩省錢糧並嚴樹森於辦理城守勸捐未能妥善等情當經諭令該撫查明覆奏茲據嚴樹森奏稱豫省本年應緩錢糧幾及十分之半若將同治元年錢糧豫行蠲免則京餉及本省兵餉均將貽誤萬不可行義丁守城均加撫恤並無怨詛亦斷不能按日給貲在籍布政使張光第等勸辦捐輸並不經手支發未能責令報銷等語該撫所陳想不至有飾說著毋庸議惟錢糧除應緩以外誠不能不取之於民而不肖有司加徵科斂最爲可惡該撫嗣後總當嚴飭所屬覈實徵收民間旣不至苦累

且知實在入官亦必樂於輸將決不至甘心抗欠至抽丁守城原屬權宜之舉仍當以情意相浹庶可聯絡民情以收眾志成城之效捻匪所過村墟皆爲灰燼惟當力圖埽蕩爲民捍患禦災方爲不負疆寄不得以攻撲數十州縣並未失守沾沾自喜也將此由五百里諭令知之○庚午諭內閣吏部具題推封外戚以光盛典一本后族承恩世爵敬查乾隆年間諭旨俱改爲三等承恩公又敬查道光三十年諭旨嗣後嫡后之父及誕聖推恩所封者俱著封爲三等承恩公其不係嫡后者著封爲一等承恩侯皆世襲罔替聖訓昭垂後世允宜遵守惟朕煢煢在疚皆賴母后皇太后聖母皇太后親裁大政撫育藐躬宵旰恩勤莫能殫述若拘泥成典於推封之例稍有區別朕心實有未安迺我母后皇太后謙抑爲懷援據典章力辭至再經我聖母皇太后

申明願復恩勤與誕育無異典禮毋得參差朕思禮宜酌古尤貴
因時 懿旨諄諄權衡至當況朕以子臣而推恩外戚其間準情
酌理與道光年間所降 諭旨原非一致天下臣民當無不共諒
朕心也除 孝德顯皇后母家業於道光三十年奉 旨照例追
封承襲公爵外 母后皇太后 聖母皇太后母家均著援照乾
隆四十三年成案推封公爵以示尊崇之至意所有追封承襲各
事宜著各該衙門查照辦理○諭議政王軍機大臣等馮子材魁
玉奏咨調揚防官兵會籌防剿並進攻賊壘情形一摺鎮江爲南
北咽喉關繫緊要見在逆匪麇聚勢甚危急都興阿雖經派兵赴
援而賊眾兵單一時未能擊退且揚防兵力本不甚厚誠恐上游
賊匪被楚軍剿急下竄麇聚天六齊撲揚郡尤宜豫爲防範以固
江北藩籬著官文曾國藩迅速會商如有可籌撥兵勇卽派委妥

員統帶交都興阿嚴密布置以備援剿兼可策應淮南以固東南大局此時鎮城軍情緊要馮子材魁玉等務宜督飭兵勇會同揚郡援兵將近城屯聚賊壘力行政克以免被賊圍偏都興阿仍宜隨時相度緩急添兵策應並於江北地方嚴密防堵毋令天六賊匪竄撲揚郡致滋蔓延將此由六百里諭令知之○張祥河以病免以王慶雲爲工部尙書羅惇衍爲左都御史

前戶部侍郎

○予江蘇

陣亡總兵官富陞四川殉難同知張中寅祭葬世職○辛未諭內閣兩宮 皇太后母家追封三代事宜業經降旨由該衙門查照辦理一等承恩侯廣科著加恩晉封爲三等承恩公照祥著加恩封爲三等承恩公○諭單懋謙奏遵查撫藩參款一摺前因御史朱夢元胡壽椿華祝三奏參江西巡撫毓科布政使慶廉等款當經降旨令前任江西學政單懋謙詳查具奏茲據奏稱上年賊擾

南贛甯都建昌瑞州等處該撫調兵援剿緩不濟急以致賊陷吉安旋踞瑞郡日久未克平時飲酒廢事於軍務未能措埋裕如慶廉被參各款雖據單懋謙奏查無實據惟前在浙江藩司任內經前撫臣晏端書列款糾參在河南巡撫任內與藩司賈臻互相參訐聲名甚爲狼藉斷難望其整躬率屬江西巡撫毓科著革去巡撫來京以四品京堂候補布政使慶廉著卽休致以示懲儆○諭議政王軍機大臣等有人奏捐例人員品流愈雜及投誠武弁包攬漁利請飭查辦各摺片據稱兩廣總督勞崇光家人許慶瑤冒捐知縣指發廣東又保舉都司陶昌培卽降賊陶八派委總巡緝捕專在省河包攬漁利等語近來事例繁開捐納人員如有出身不正者各省大吏卽應隨時畱心甄察毋令溷迹搢紳致爲民害其各處投誠賊匪如能悔罪自新原許量才錄用若如所奏肆行

無忌雖有衝鋒禦侮之才豈宜曲爲徇庇貽毒地方羅惇衍籍隸
廣東著卽會同穆克德訥將所參許慶瑤陶昌培各款確切詳查
據實具奏該員在籍日久於本地情形自必周知穆克德訥係同
在一城均無所用其回護諒不至稍涉瞻徇又前據耆齡奏參勞
崇光劣蹟昭著一摺及勞崇光始則畏夷繼則與夷酋巴夏禮交
密等二片其摺內所稱淆溷品流縱容劣弁二款卽指許慶瑤陶
昌培而言其餘尙有藉端販運縱弁殘殺膜視京倉奏事欺蒙調
度乖方濫收門生保舉不實任用奸胥等款督撫大吏於地方利
害所關甚鉅耆齡所參各款是否均係勞崇光實在劣蹟抑或該
督撫有意見不和之處著羅惇衍穆克德訥一併詳查秉公據實
覆奏各摺片均著鈔給閱看將此由五百里各密諭知之○諭有
人奏請飭練東三省官兵一摺盛京吉林黑龍江馬隊官兵夙稱

勁旅近來屢次徵調漸至疲輓若如所奏該省兵丁分城居屯居城居多係世族故拔補雖多不盡真材屯居半屬寒微進身不易就有真材亦甘廢棄視考驗爲具文以操練爲故事則是國家營伍爲該將軍調劑世族之地如此強分區別安望兵心鼓舞無怪一遇徵調派出之兵槍箭未嫻弓馬不習徒糜餉項甚可痛恨根本重地豈宜有此等惡習該將軍等均係滿洲舊僕膺此重寄竟不思破除情面任令積習相沿儻一經查辦豈能當此重咎著玉明景綸特普欽督同副都統等力除積習嚴定章程無論在城在屯一體認真訓練秉公挑選有技藝嫻熟槍箭出眾者立予超擢其不得力者輕則責罰重則裁革屯居寒苦兵丁家計艱難酌量周恤俾得專心行伍不至有荒本業遇有可造之才卽著多方鼓舞庶賞罰嚴明羣情觀感經此次訓飭之後如不能操練得力仍

前疲輒朕必治該將軍等以廢弛之罪至所請仍按舊章舉行圍獵儻兵數不足卽挑選餘丁一同操演由該將軍副都統等親爲督練隨時懲獎以備將來挑補兵額等語是否可行卽著王明景綸特普欽等妥籌具奏將此各諭令知之○諭慶端奏統兵出省暫駐建甯府城並福鼎縣城克復各摺片慶端自九月間已有援浙之請迨聞浙報日警該督藉口北路喫緊至今已逾兩月輒思駐紮建甯顯係心存畏葸豈勝兼圻之任曾元福所募臺勇早據該督奏報何以不催令內渡顏青雲由海道援浙之師聞甯波有警正當星馳往援乃該督信其飾詞任令侯曾玉明募勇到後再行前往曠日持久亦安用此援兵爲耶著慶端仍遵前旨馳赴閩浙交界地方駐紮並迅催曾元福顏青雲援浙毋再遷延干咎閩省巡防事宜卽由瑞璣會同文清派撥旗綠各營官兵添募壯勇

妥爲布置福鼎縣城是否克復在鄉匪徒卽飭迅速剿捕毋令蔓延前任江西吉安南贛甯道沈葆楨朕久聞其德望冠時才堪應變本日降旨超擢江西巡撫該撫雖係回籍養親之員第賊匪一日未平則臣子之心一日不得自安況移孝作忠古有明訓朕以該撫家有老親因擇江西毗鄰省分授以疆寄風土不殊迎養亦近且係該撫曾經仕宦之區將來懋建殊勳尤足光榮門戶以承親歡該撫讀書明理經朕如此體恤如此破格委任儻仍以養親等事希冀辭讓朕亦不能允准也將此由六百里各諭令知之○諭有人奏田興恕擁兵玩寇縱吏殃民一摺田興恕起自行間朝廷破格錄用若因驟致高位不但不能畱心吏治並於軍務亦復不以爲事是以有用之才轉爲無用駱秉章自湖南入川於該員材器諒所素知且川黔接壤該員近來辦理軍務情形亦必確有

聞見著按照所參與前諭各節一併詳查據實具奏如果黔省軍務不過苗土等匪能得賢能巡撫將地方整頓與提督合力辦理即可蕩平毋庸設立欽差大臣轉能責令田興恕披堅執銳所向有功是於該員既得保全而黔省軍民亦實受其福著駱秉章亦卽迅速妥籌具奏潘鐸簡署雲貴總督道出蜀中著將田興恕被參各節及黔省應辦事宜一併商同駱秉章奏明辦理惟該督行走需時駱秉章一經查確卽先行馳奏以慰廬念並卽告以該大臣見挂彈章儻再不知振作定必自干罪戾也原摺著鈔給閱看將此由六百里各諭令知之○諭賈臻奏探聞粵逆北竄潁郡喫緊請飭各路統兵大員分路堵剿一摺據稱探聞狗逆陳玉城夥黨馬逆帶賊數萬至潁上縣西並探聞廬郡已經克復髮逆程保民於南照集等處屯踞四眼狗亦接踵到正陽關等語該逆意圖

北竄潁州爲所必經若如該署撫所奏廬州儻已克復多隆阿一軍自必乘勝追勦著曾國藩飭令該將軍統廬州得勝之兵於正陽關上游等處渡淮進擊彭玉麟李續宜亦可飭統率楚勇各員繞出賊前迎頭遏勦其總兵成大吉道員蔣凝學並催令馳赴潁郡以備北面至光岡信陽一帶爲豫省南路門戶卽著嚴樹森毛昶熙督飭各軍實力扼守又據奏探聞苗沛霖赴袁甲三軍營乞撫是否確實該大臣總宜相機辦理毋令與粵逆互相勾結以致官軍爲之牽掣賈臻仍應就見有兵力與紳練實力防勦不得稍涉鬆懈將此由六百里加緊各諭令知之○諭各省查參捐納人員出身卑賤者○命恭親王醇郡王督率都統瑞麟侍郎文祥崇綸署都統福興副都統遮克敦布管理神機營○以沈葆楨爲江西巡撫由前江南李桓爲江西布政使由督糧沈葆楨未到任前

以李桓暫署○壬申諭內閣前因宗人府奏和碩鄭親王端華怡親王載垣獲罪革爵所遺之爵應否承襲聲明例案並將該王等所得之冊文敕書另繕呈覽請旨辦理一摺當交大學士九卿會議具奏茲據桂良等奏端華載垣跋扈不臣既負國家綏養之恩且爲乃祖勲名之玷今旣身罹重辟厥罪惟均均應永遠革削爵秩以昭炯戒等語朝廷賞功罰罪一秉至公冊文敕書所載親賢褒寵或早深爲狂悖之戒或不忍有逆料之詞而端華載垣之罪大惡極眞不爲其祖宗少留餘地卽如該大學士九卿等所議永遠革除爵秩亦屬權衡至當惟念鄭獻親王濟爾哈朗怡賢親王允祥功勲卓著炳耀旂常以端華載垣之故若遽使其支裔投閒置散無歲時奉祀之人九原有知豈無餘痛朕心究有不忍端華載垣世襲爵秩均著降爲不入八分輔國公照例於始

封立官人之後裔內擇其向有襲次房分排列在前僅止有分房分排列在後如各房分均屬相同卽以長幼之序排列帶領引見其端華載垣子孫及親兄弟姪均不准其揀選○諭聯捷奏查覆前奏軍情係據獲賊供詞聲敘並自請於防務稍鬆與段晴川輪替省親等語聯捷與段晴川辦理河北一帶防河事務自應常川在營聞警卽帶兵攔剿前因聯捷奏稱段晴川見未在營當經諭令聯捷查明該員因何擅自離營茲據奏段晴川因母老病回籍省視自稱亦有老母迎養懷慶僦居此後乞於防務偶鬆之時與段晴川輪替省親等語聯捷辦理河北防務本屬未能得力節經訓諭實力辦理仍復不知振作乃因飭查段晴川離營一事竟敢自以省親爲請段晴川本係告養回籍之員旣與聯捷同辦防河因省視母病回籍並未奏明輒自離營已屬非是聯捷帶兵防河

是其專責何以輒以迎養省親等詞入告其爲不能盡心軍務公爾忘私已可概見此等庸懦之員即使常在軍營亦必不能得力候補四品京堂聯捷著降爲五品京堂卽行來京段晴川著交部議處○諭議政王軍機大臣等聯捷辦理防河本屬不能得力於軍情奏報旣多不實不盡又復以軍營帶兵之員自請離營省親其爲不能盡心剿賊已可概見茲旣將其撤回惟河壩一帶直東豫三省均有分轄之區前據各該撫均已奏明自任督飭各該地方文武實力防剿不使一賊竄渡見在聯捷撤回著文煜譚廷襄仍遵前旨妥密籌防毋稍疏懈河北衛輝所屬近日又有賊氛嚴樹森奏報又經剿擊肅清究竟有無把握不至再有滋擾段晴川本係河南省幫辦團練之員聯捷所帶兵勇卽著段晴川接統其眾實力辦理嚴樹森前奏該員甚爲得力該撫於段晴川知之素

悉諒不至強以所難亦必不任藉詞諉卸致誤事機也將此由六百里各諭令知之○毛昶熙奏今天下大患粵匪與捻匪而已然粵匪初起由兩湖擾至江皖沿途裹脅皆剽疾善戰之人故其鋒甚銳今安慶舒桐已爲我軍克復江北可望肅清長髮老賊日少一日見雖竄擾江浙亦不過苟延性命不足爲心腹之患也惟捻匪皆產於江北風氣强悍素習爭鬪且實繁有徒以旗計者十餘以股計者百餘以圩計者千餘近日汝光土匪應之濮范土匪應之曹單長槍會匪復應之黨與日眾漸成燎原之勢若不亟籌撲滅何以靖東豫而衛畿輔臣竊觀向來辦法未能得其要領者其誤有二三則誤於專言防堵者也夫擒匪出巢必糾集五色雜旗或分三路或分五路同時內擾而一路之中又分多股我如分路堵之則兵分力單如合力堵之則此剿彼竄蓋堵之一法止可用

於有險可守之區如豫省虎牢黑石二關及老犍坡等處是也至
潁徐歸陳平原千里毫無險阻猶之院本無牆而猶襲守門遏盜
之說不亦謬乎一則誤於無成算而輕戰也夫賊之出竄其眾數
倍於我其馬則十倍於我若毫無把握卽欲僥倖成功一經挫敗
我軍氣餒賊餒愈張上年豫省野豬岡之敗良將勁兵大半陷沒
本年撫臣嚴樹森遠招近募訓練講求借將於楚招勇於湘可謂
不遺餘力矣雖漸有可觀尙覺元氣未復至於會合各路兵力直
擣老巢實爲平賊要策臣駐兵宋郡去毫尤近俟各路進兵有期
自當策勵各軍會合進剿但就見在時勢言之恐各路官兵仍難
剋期會合蓋皖捻雖以張落刑爲盟主以劉狗蘇添才姜台凌王
懷義宋禧沅爲大股其實則各統其眾各居其巢陳宋潁壽淮徐
之間地方數百里實無處非賊巢各路肘腋之間賊窟尙多次第

埽除尙難淨盡卽以歸德而論除夏秋間經臣督率將弁攻克洪樓周堂十餘寨外見在全力圍攻金樓馬廠二圩尙未得手皆賊巢之當豫衝者此外渦河以北尙有賊圩數十座均須節節埽蕩然後進兵毫東方無內患若繞過小捻各巢徑擣大捻老巢未始非擒渠殲魁之計但越近攻遠恐遠賊堅守堡寨於前近賊斷我餉道於後不出十日我軍自潰此會擣老巢之舉恐難剋期集事也而臣竊謂捻匪有可平之機制捻有萬全必勝之策謹爲我皇上陳之查捻匪有每股捻首所養馬步常賊不過二三千人餘則各處各圩無事之時不惟此股與彼股未嘗聚處卽一股之中其捻首與小頭目亦各散居故其勢常分其出竄也必先裝旗其裝旗也必先演戲糾約各圩匪目及外股捻首議定每圩出人若干名出馬若干匹約會於某日至某處聚齊然後分股肆擾故常

十餘日始能出竄大約賊之竄山東者多在保安山龍山等處聚
齊賊之竄汴梁者多在小柰集大寺集等處聚齊賊之竄陳州者
多在南十字河張信湮等處聚齊此數地者皆逼近亳州故亳州
者賊之吭也爲今之計莫若擇重臣素有威望者統步隊二三萬
人東三省馬隊數千人駐紮亳州城內專辦剿捻事務用春秋吳
臣伍員多方誤楚之法將所部馬步分爲數起輪流疊出循環不
斷衝突於各捻圩之間遇邊馬則殲之遇輜重則焚之使毫捻各
股大匪無從勾結卽本股諸圩亦聲息不通惴惴自守日防官兵
之至自不能裝旗出竄肆出打糧不出兩月飢潰立形然後以重
兵次第圍攻大股賊無外援必易得手大股旣平則小股膽落兼
用招撫立可解散不必盡煩兵力矣且歸德附近小捻本易平滅
無如亳東大股動輒來援往往功敗垂成秋冬以來我兵圍攻金

樓馬廐二賊圩志在必克

臣

方謂功成在指顧矣乃劉狗宋濬沅

楊懋汰蘇全等大股統眾來援致未得手至今思之猶爲痛惜一

路如此各路可知若毫城之內駐有重兵則各股大捻自顧不暇

必不肯舍已救人

臣

可乘此機會攻剿渦北各圩各路軍營亦可

掃清肘腋會合進兵直搗毫東削平巨患查見在統兵大員威望

素著爲各巨捻畏懼者無如科爾沁親王僧格林沁一人蓋捻馬

雖多不過藉以衝突其實馬上之賊毫無技藝萬不能當我東三

省馬隊僧格林沁一軍馬隊本多其管帶將弁又多驍勇之材故

徐毫各捻無不聞而喪膽上年僧營甫紮濟甯而毫東捻匪已多

難髮潛逃維時巨逆趙浩然恐大兵至毫卽糾集各股頭目徑赴

東省爲牽掣我軍之計不幸官兵失利賊勢復振自是之後毫捻

之赴山東者絡繹不絕其拒兵於境外者實恐進兵於州城也至

山東新起之匪不過爲毫捻所煽惑如僧格林沁統領重兵進紮
毫城則毫捻不敢遠出山東土匪其勢自衰勝保統帶重兵見駐
濮范距曹單一帶甚近自可就近歸其勦辦以專責成至徐宿一
帶土著本少大捻其向由該處竄擾山東者亦係毫捻居多若毫
捻勢蹙自可無虞卽間有零星土捻竄擾東境亦可責成田在田
吳棠會合勝保兵勇前後扼截以固北路俟東境全清卽行會合
各路大兵直擣老巢臣所部兵勇雖止五千亦當策勵各營會合
截剿又奏亳州爲各捻匪處卽爲北防扼要之地誠有重臣統兵
駐紮則各股巨捻自救弗遑無暇竄豫亦無暇竄東外來之大賊
旣絕內地之小匪易平是扼亳州正以靖豫東靖豫東正以衛畿
輔拔本塞源提綱挈領較之隨處補苴似有把握本年十月間僧
格林沁前軍偶至蕭境其時永碭蒙亳間奸民無不惕息我軍已

有破竹之勢嗣聞此軍回東遠近紳民無不失望至蒙毫百姓皆有天良何以從賊日眾甘心叛逆總由賊匪太近大營太遠蚩蚩之氓不堪擄掠焚殺之苦勉強附從並非本心實爲可憫況其間良民堡寨多與賊圩犬牙錯處尙有甘受荼毒不肯從逆者若不及時拯救終恐盡陷賊中儻蒙 皇上天恩特命重臣統兵駐毫勦撫兼施不但良民同心殺賊卽附賊堡寨亦將漸次就撫輔助官兵伏願 皇上速決大計不必俟東境之全清卽先催重兵之進紮則中原之完善可全北路之防維永固 上諭議政王軍機大臣等毛利熙奏亳州爲羣捻聚齊之所平時各處各圩其勢常散迨欲出竄必先裝旗演戲須十餘日之久若得威望素著重臣如僧格林沁者統帶步隊二三萬人東三省馬隊數千入駐紮亳州城外將所部馬步隊分爲數起輪流疊出爲多方以誤之計使

毫捻各大股無從勾結卽本股各圩亦聲息不通該捻日防官軍之至自不能裝旗出竄然後以重兵次第圍攻各圩兼用招撫立可解散毛昶熙尙可以所部兵勇五千會合截剿等語覽其所陳於地勢賊情均得要領未爲無見惟僧格林沁見與勝保會攻曹南各匪若移兵駐紮亳州於事機有無妨礙且南捻出巢北竄之匪能否悉行堵截不至腹背受敵之處均著該大臣熟審機宜迅速覆奏至直東股匪專歸勝保勦辦一節是否足資堵禦並著一併覆奏將此由六百里諭令知之○諭勝保奏接據各路探報粵逆有圖犯豫陝之信及馳赴曹州會同僧格林沁合力勦辦並將副都統薩薩佈等稟呈覽諒不以危詞上聳聽聞惟豫省軍務嚴樹森自任甚力見在該大臣馳赴曹屬會同僧格林沁合勦卽著將各屬匪徒滅除淨盡曹屬距直隸甚近關繫北路門戶若不剋

期埽蕩爲所牽掣豈能南下但不可希圖迅速了事仍畱後患僧
格林沁等諒以軍務爲重當和衷商酌通籌滅賊之方毋致彼此
各存意見至勝保應否親赴張秋鎮調度之處並著酌量情形會
商辦理譚廷襄所需兵勇卽由勝保派給千名駐紮東昌以資彈
壓勝保赴東省後糧臺委員卽著譚廷襄派員辦理所需餉銀並
著該撫於藩運兩庫撥給銀二萬兩務於年內解到以濟要需毋
稍遲誤將此由六百里各諭令知之○諭徐之銘奏攻克楚雄府
城及祿豐等州縣城池並遵保守城擊賊出力之文武官紳各摺
片徐之銘辦理滇中軍務措置乖方聲名狼藉此次鋪敘戰功殊
難憑信其所保各員亦難保無賄託夤緣飾功冒獎情弊卽如在
籍侍郎黃琮經從前吳振械曾以其辦理不善指名參奏此次徐
之銘片內則稱其保衛地方忠盡宣勤請賞頭品頂帶又爲道員

丁鳳皋請以四川道員記名簡放尤與吏部奏定新章不符至另片所稱戰將官職愈大漸形把持跋扈制之太急轉生事端請將臨元鎮總兵林自清調任近畿等語該撫爲林自清奏請記名提督而於片內又欲移之他處其爲毫無振作處處受人挾制已可概見邊疆大吏至於如此地方又安望有起色耶潘鐸經朕特簡命署雲貴總督著於到任後將徐之銘陳奏各節秉公確查奏明辦理至案內請獎人員如果確有勞績亦著據實覈請獎敘以示鼓勵不得因徐之銘所保概令向隅也原摺片八件單三件均著鈔給閱看將此由四百里諭令知之○諭前因有人奏田興恕奏報各情諸多欺罔當經諭令該大臣明白回奏茲據奏本年同仁之捷實賴楚軍之力而該郡與晃州廳相距僅數十里可以朝發夕至因據探報遂奏稱陸傳應董仲孚親歷行間其接仗情形及

攻勦日月詳黔略楚不免小有舛錯請先行交部議處等語田興
恕起自行間蒙 皇考文宗顯皇帝擢任提督兼膺統帥之寄復
經朕派署黔撫於人臣之分寵勞已極此次經朕開誠訓誡令其
自行回奏諒不敢有所粉飾該大臣以宋臣岳飛自許臂刺精忠
報國四字覽其所奏深堪嘉許若能如此立志終始不渝則將來
建立殊勳榮晉崇封均可操券得之第恐位極志滿驕淫奢侈無
所不至卒致身敗名裂貽笑古今豈不可惜該大臣務當痛以爲
戒當此逆賊未平嘗膽臥薪正我君臣交飭之候如該大臣之受
恩優渥尤應深自刻責朕保全臣工不肯苛其小節此次既據奏
稱事出有因姑亦無容深究所請交部議處著加恩寬免況欺飾
之罪亦非僅議處所能了事嗣後總當以滅賊爲志不可因位高
而自耽安逸著卽統兵出省將被陷郡縣剋期收復不得以居中

調度爲詞任其肆擾朕於萋斐之言無從搖惑而嚴覈功罪亦不容稍有假借若該大臣不能持其初志肆意妄爲朕亦不能顧惜也另片奏副將彭廷勝侵吞兵餉銀都司姚復錢臨陣不前府經歷周鍾秀侵蝕釐金均經正法等語此等貪劣之員自應正法軍前以昭炯戒但亦須詳細審慎則法立而人知畏若意在自作威福或因一時喜怒則必致人心不服於軍務甚有關繫該大臣務宜賞罰公允毋致有失眾望方不負朕諄諄訓誡也將此由六百里諭令知之○以捐官流品溷雜飭出結官認真稽察○癸酉諭內閣宋晉奏 募陵規制樸實儉約萬古可法見在 定陵工程可否仿照辦理一摺著王大臣大學士六部九卿翰詹科道敬謹會同妥議具奏○諭前據彭蘊章奏派辦 平安峪工程各堂官向均扣銀一成令全慶瑞麟基溥明善周祖培綿森明白回奏茲

據全慶等覆奏提存節省一成銀兩數目分別存儲畱備辦工各等語此項節省一成本係相沿陋習又兼端華等邪說相煽遂以收受視爲故常朕亦不爲已甚均著卽行繳還交宗人府銀庫收存以備辦工○毛昶熙奏十二月初四日擒匪劉添詳劉添幅等經僧格林沁大兵擊敗後由東回竄尙有六七千人沿途勾結土匪數千共有一萬餘人將近歸德境內臣嚴飭前敵各營實力圍攻另派守備蔣東才等帶領所部迎剿東路一面飛飭參將陳祿興帶兵迎剿西路復思賊眾兵單必須調團兜截因飭歸德各屬官紳調集練丁各就堡寨附近地方屯紮初六日賊分兩股一竄商邱之徐隆店一竄商邱之李口集每股六七千人經徐隆店練長訓導王烺然等率團分道設伏其時大霧瀰漫該匪向前行走我勇伺隙包鈔槍礮齊施賊眾大亂奪路狂奔練勇乘勢追殺斃

匪二千餘人其竄李口集一股經武生李崇斌等乘霧迎擊轟斃賊目一名殺斃餘逆五六百名生擒一百六十三名兩股均經擊敗餘賊分竄塢牆集等處經該集練長趙端木等帶練出寨四面屯紮賊至齊出兜剿殺賊一千餘名追擊二十餘里又經石樁塢站寨練長貢生盧儒範等聯絡團勇截擊殺斃一千餘名生擒擒逆三十餘名餘匪欲由馬頭寺逃回老巢經委員王之翰督同練總縣丞董敬儀等統領團勇沿途追殺一千餘名生擒一百三十三名內有擒首劉添增二號雷二名並紅衣賊目五名該匪四散逃奔各寨練勇處處攔截殺賊數百名至數十名不等據擒賊供稱擒首劉添幅劉添詳擒目徐本化均被殺斃各寨通共殺賊八千餘名生擒五百七十餘名查劉添詳等大股擒匪意圖由豫竄回老巢經臣檄飭團練輔助官兵分途截剿大獲全勝逆股殲除

殆盡劉添幅劉添詳二逆均被陣斬宋郡團練實屬奮勇異常出力員弁勇丁容臣彙案請獎上諭內閣此次毛昶熙調集鄉團擊剿大股捻匪竟能合力殲除斬馘至八千餘名之多辦理甚爲得手仍著督飭兵練乘勝進剿將敗殘餘匪悉數殄除出力員弁勇丁著毛昶熙彙案擇尤保奏○諭議政王軍機大臣等前據彭玉麟奏不習吏事懇請開缺仍帶水師當經諭令仍行接印任事籌剿苗練茲據彭玉麟奏苗逆必應剿辦惟楚師須俟廬州攻克方能併力攻苗並皖撫宜帶陸兵該撫難離水營仍懇准令開缺等語該撫居心誠實不欺卽此可見惟苗練見在勾結髮逆肆行竄擾潁州危急見在皖撫一時難得其人彭玉麟身任地方責無旁貸自應遵照前旨統帶楚師速行繞赴潁阜一帶嚴扼北路要隘毋任匪蹤再得上竄如彭玉麟自分舍水就陸諸多掣肘當此

皖省軍情萬緊著卽會同曾國藩李續宜籌商人才薦賢自代卽由曾國藩等迅速奏聞候旨簡放其總兵成大吉道員蔣凝學等軍見在霍六等處去潁較近並著曾國藩會商官文李續宜迅飭該總兵等迎頭截擊以固北路藩籬提督楊載福請假回籍行抵何處著曾國藩催令該提督迅速回營如果彭玉麟可以赴任庶水師不至無人統帶將此由六百里諭令知之○諭據毛昶熙奏毫捻大股由東省回竄老巢各路兵團截擊全股撲滅殆盡一摺近來捻匪縱橫東豫之交歷有年所一經剿擊卽遁回老巢俟次年春間又復肆出焚掠總未大受懲創以致旬結日多逆氛愈熾此次數百里內團練堡寨齊心協力將劉添幅劉添祥二逆首臨陣殺斃斬馘八千有奇全股殲除幾盡洵足以寒賊膽而快人心所有各堡寨民團著毛昶熙更加激勵會合官兵先將敗殘餘匪

實力勦洗並一面簡練兵勇會合各路官軍設法進攻老巢以期
壩穴擒渠不至乘機再行肆擾方可一勞永逸將此由五百里諭
令知之○甲戌諭內閣近年江蘇安徽浙江地方被賊蹂躪小民
流離失業慘不忍言屢經降旨蠲免錢糧冀蘇民困見在該三省
失陷城邑多未攻克卽令漸次規復而田廬半遭兵燹耕作未免
失時朕耽懷南服深用惻然所有江蘇安徽浙江失陷郡縣明年
錢糧漕米著全行蠲免以紓民力該督撫卽刊刻謄黃徧行曉諭
務使實惠均霑毋任吏胥舞弊用副朕加惠窮黎至意○翁心存
疏請力保通泰規復蘇常宋晉請合江北兵力圖江南命曾國藩
等迅籌勦辦薛煥毋得再議招撫○乙亥諭內閣江忠義奏懇情
懇請在籍終制一摺情詞甚爲懇惻自應俯如所請江忠義著准
其開署貴州巡撫之缺在籍終制仍著在湖南本省帶兵勦賊以

符金革毋避之義貴州巡撫仍著田興恕暫行兼署○諭議政王軍機大臣等毛鴻賓奏官兵截剿石逆股匪疊獲大勝一摺石逆竄擾湖南邊境雖經官軍沿途剿殺力挫兇鋒而餘眾猶萬餘勢將乘虛竄逸辰永乾鳳各屬山徑叢雜自應嚴密防剿毛鴻賓已派副將朱升聞等馳赴辰州卽著催令速進以剿爲防總兵劉培元師船一併催令上駛與陸師聯絡抵禦其總兵趙福元及道員劉嶽昭進規來鳳各軍並著分別嚴催速籌剿辦務令大股逆匪一鼓殲除毋令與來鳳賊匪合而爲一致成滋蔓至石逆詭譎異常行蹤飄忽無論入黔入蜀但令竄及境內皆有不可收拾之勢田興恕前次奏稱調派總兵成應洪等帶兵馳赴會同夾擊著卽督飭該員等星馳前往實力協剿並著駱秉章於黔楚交界地方揀派得力將弁帶兵防剿毋令賊蹤擾及邊界將此由六百里各

諭令知之○諭張亮基奏薦舉非人自請議處並請撤撫臣印信及憑陳鄧爾恆被戕情形各摺片徐之銘在滇專恣妄殺爲從來督撫中所未有必應嚴行懲辦方足以示懲儆張亮基誤舉非人自有應得之咎第如徐之銘種種貪劣貽誤疆務情罪重大張亮基與之共事二年豈竟不能豫先覺察不過喜其親暱列入剡章若律以貽誤之咎則張亮基之咎甚重非僅議處所能塞責鄧爾恆被戕之案日久未予查辦亦無以彰國憲花詠春不敢與徐之銘違抗則令收其印信亦恐徒成虛語前令張亮基來京原欲面詢滇省情形再行諭令前往見在徐之銘怙惡不悛未可稍形稽緩署總督潘鐸到任需時卽著張亮基迅速馳赴雲南督辦該省軍務將徐之銘先行撤任所有雲南巡撫印務張亮基卽行接署並將鄧爾恆被戕之案徹底根究按律懲辦何有保父子如此跋

扈必須設法迅速翦除而又宜先防其設計暗害毋稍大意其回漢互鬪事宜如田興恕可以相助卽著相機辦理敕安邊圍以贖前愆不准沿途藉口逗遛徒以空詞粉飾所有自請議處之處著暫行寬免若不仰體朕心仍前貽誤則必將前後罪狀宣示恐不能當此重咎也將此由六百里密諭知之○諭江忠義奏瀝情懇請終制一摺江忠義瀝陳前在廬州聞計丁父憂墨經從戎上年五月復丁母憂又以奉檄剿賊不暇自顧其私見又擢署貴州巡撫變服受任禮所未安懇請在籍終制各等語情詞極爲懇惻是以不忍盡拂其意勉從所請俾遂人子之私惟是墨經從戎古有明訓湖南賊氛未淨四郊多壘該員豈得遂以在籍終制忽然自安江忠義著仍在湖南本籍帶兵剿賊該員忠孝一門素稱勇敢經此次訓諭諒必更能移孝作忠盡心軍旅毛鴻賓所奏該員逗

邇武岡致賊西竄乃以擇吉葬母請爲代奏一面卽徑自回籍咎有難辭等語江忠義陳請歸葬自屬迫於私情尙有可原毛鴻賓據實劾奏亦屬職分當然之事毛鴻賓江忠義嗣後惟當以公事爲重和衷辦理不得以地位相埒各懷疑忌尤不得稍存成見遇事齟齬致於軍務有妨自干咎戾將此由六百里各諭令知之○命南書房翰林錄孫嘉淦三習一弊疏備覽○林揚祖休致以恩麟爲甘肅布政使劉于溥爲甘肅按察使由安肅道遷○予湖南陣亡縣丞錢敬敷等祭葬世職○丙子諭議王軍機大臣等賈臻奏髮捻撲犯潁郡迎剿獲勝賊勢仍行猖獗一摺前因賈臻奏稱髮捻有犯潁上之信曾諭令袁甲三等派兵馳援見在直撲潁郡雖經擊退而陳逆有續派逆眾八萬赴潁之說袁甲三督辦皖省軍務賊勢如此鴟張何以毫無聞見從無一字奏報殊堪駭異著袁甲

三確探實在情形奏聞一面會同李世忠酌派兵勇繞赴潁郡協同防剿其進剿機宜亦卽迅速馳奏淮南漸次肅清而潁郡地據形勝實爲淮北鎖鑰彭玉麟雖據稱無陸軍可撥李續宜又以霍六防兵太單未可抽調第賊情如此緊急潁郡稍有疏虞北路又難措手著官文李續宜彭玉麟會商酌量情形迅撥兵勇繞赴潁郡如實在無兵可撥卽商同曾國藩設法抽調以保名城官文等素無畛域之見務當通籌全局不可稍涉遲緩賈臻以本省藩司自當就近會商袁甲三等撥兵協剿勝保遠在數千里外豈能剋期援救殊屬不知緩急儻潁郡有失朕必重治其罪決不寬貸將此由六百里加緊各諭令知之○諭賈臻奏髮捻各逆趨撲潁郡賊勢猖獗請飭催南北援軍兼程來潁一摺僧格林沁與勝保方併力曹南捻股未知能否剋期殄除酌量南下賈臻所請飭催勝

保與所派前隊總兵成祿一軍兼程南向見在曹南剿辦正當喫緊該處爲北路藩籬所關尤鉅勝保之軍斷不能全數卽行若如前奏輕騎而南或僅恃成祿所帶一軍又恐不能制賊萬一稍有挫失致墮北路兵威甚爲非策本日業經先行寄諭官文等迅籌撥兵救援第恐髮捻併力來犯尙未免賊眾兵單著僧格林沁勝保會合妥籌見在曹南剿辦曾否廓清前據毛昶熙奏請移兵駐紮亳州已交僧格林沁詳細覈議是否可行抑或於北路藩籬獨力擔承使勝保能分身南下於剿辦髮捻機宜能否確有把握迅速相機籌辦總期南北兼權毋致顧此失彼方爲妥善並卽確探潁郡情形一併馳奏將此由六百里各諭令知之○命田興恕毋庸兼署巡撫賞韓超二品頂帶署貴州巡撫

由糧儲道署

○丁丑諭議

政王軍機大臣等袁甲三奏辦理定遠善後已有頭緒亟圖聯絡

楚師規復廬郡及捻股竄擾固鎮另股東竄請飭僧格林沁等派隊扼剿各摺片捻首任柱等意在清淮袁甲三已派將領渡滄紫營惟兵勇分布要隘不敷抽撥如該逆果以另股東竄則雖宿一帶處處空虛甚爲可慮著田在田派撥馬隊由北路確探進剿以牽賊勢毋令匪蹤肆行闌入僧格林沁剿辦曹州匪徒能否抽撥兵勇兼顧睢宿著酌度辦理並著吳棠迅派勁旅前赴桃源一帶擇要紮營以固清淮門戶至袁甲三駐臨多年專辦捻匪且兵勇不少何以云抽撥甚難意存推諉殊屬非是著迅速派撥勁兵層層布置與田在田吳棠等派出之兵聯絡聲勢將敗竄回圩賊匪奮力剿除勿任牽掣昨據賈臻奏潁郡危急情形袁甲三本日奏報仍未知賊匪欲犯潁州臨淮距潁郡不遠何以視同秦越仍著與李世忠賈臻會商援應袁甲三惟當就見有兵力酌量兼顧不

得專待客兵也李世忠部下人數眾多而營餉久缺豈能責其效力行間著吳棠按照所請飭運司喬松年按月運解毋得有名無實以資接濟至此項餉鹽原係一時權宜之策勿令擾累商民是爲至要將此由六百里各諭令知之○諭前據賈臻奏髮捻各匪撲犯潁郡當經諭令官文等撥兵由三河尖赴潁以資援救茲據袁甲三奏稱狗逆屢挫之後其黨皆思倒戈廬州近城各練亦皆願奮力助剿待時而動上以苗練探有句黨攻潁之信見在蔣凝學等由六安進攻壽州多隆阿由舒城規取廬郡事機所湊未可多延時日各等語粵逆困守廬州勢已窮蹙見復句結捻匪撲犯潁郡未始非苗沛霖從中爲之設策見在賊中吳永璧等願爲內應並倒戈殺賊附城各圩復願助剿著曾國藩飭令多隆阿迅速進兵並密約袁甲三激勵內應匪黨及各圩團練剋期舉事以期

速復城池無稍觀望至該逆勾結捻匪撲擾潁州兇燄甚熾袁甲三未能越壽赴援而賈臻復萬不足恃設有疏虞爲患非細此股賊勢較重袁甲三豫備兩路接應共圖掃蕩意在得一統率楚軍之大員前往著官文曾國藩酌量情形一面添兵接應蔣凝學一面商令李續宜親行督剿迅速出省馳赴皖楚交界地方躬親調度楚北巡撫由官文等酌量派員奏請暫署官文等於皖事本無畛域見在皖事較急於楚諒不至有他諉也至髮捻各匪竄潁卽爲窺豫之計嚴樹森於該省邊防諒有布置惟近防不如遠剿卽著該撫會同毛昶熙調撥得力兵勇派委得力大員統帶剋日出境會同楚皖各軍實力剿辦儻任賊眾西趨或致北犯朕惟嚴樹森是問將此由六百里各諭令知之○駱秉章奏據署酉陽州知州王麟稟報石逆擁眾四五萬由湖南靖州竄擾沅州麻陽逼近

鎮草臣查石逆由粵入楚勢漸西趨專意窺伺川疆劉嶽昭一軍見由湖北先撥五營前赴施南勦辦來鳳股匪該道親督四營暫駐宜昌候領月餉此軍久經行陣臣已飛檄劉嶽昭即日拔營並調合全隊馳赴夔萬確切偵探如石逆已竄徧西秀卽由黔江趨赴迎勦儻石逆與來鳳之賊合股竄向利川卽由萬縣進兵扼截惟劉嶽昭一軍四千餘人尙嫌單薄臣又飛咨署貴州巡撫提臣田興恕由黔撥兵合力堵擊仰懇天恩飭下田興恕速派總兵沈宏富劉義方熊煥章酌帶得力兵勇五六千人馳赴松桃銅仁一帶與劉嶽昭會合相機勦辦以厚兵力而殄逆氛上諭劉嶽昭一軍見在施南勦辦來鳳股匪此軍久經行陣著官文李續宜毛鴻賓飛飭該員卽調全軍馳赴夔萬一帶探賊所向迎頭扼截並令與湖南官軍會合勦辦以期殲除巨憝毋任再事蔓延昨據

毛鴻賓奏飭劉嶽昭分營由鶴峯州邊界進規來鳳卽以兼顧永定龍山如果石逆一股勢將合併便可橫出邀擊與湖南官軍協剿等情與駱秉章大意相同惟該員所部僅四千人恐未能分營兼顧見在賊勢趨重何路官文卽飭該道由何路進剿隨同會商辦理毋得稍存畛域之見致誤事機川省邊防仍著駱秉章妥爲布置將此由六百里各諭令知之○諭石達開垂涎川省已久此次率眾西趨深虞闖入見在該省兵力專辦李逆難於分撥雖已催劉嶽昭前往截剿尙虞單薄著田興恕卽行挑選精銳兵勇五六千人派令總兵沈宏富劉義方能煥章管帶剋日馳赴松桃銅仁一帶探明賊蹤所向會同劉嶽昭迎頭攔截與湖南官兵實力擊剿務令就地殲除勿任得入川境其成應洪一軍仍遵前旨飭赴會同助剿在該大臣矢志公忠諒能無分畛域妥爲調派勿致

遲緩有誤事機韓超既經特簡務須實心任事以期無負委任此
後該省軍情卽著田興恕韓超會同奏報除各省武職本應歸田
興恕節制外其文職各員舉劾均著韓超覆奏各專責成以免歧
誤將此由六百里各諭令知之○以左宗棠爲浙江巡撫由太常寺卿遷
○改彭玉麟爲水師提督調李續宜爲安徽巡撫嚴樹森爲湖北
巡撫以鄭元善爲河南巡撫張曜爲河南布政使○戊寅諭內閣
薛煥奏據報浙江省城失守代遞瑞昌王有齡奏摺杭城久困危
急情形等語浙江省城被圍已逾兩月卒以糧盡援絕被匪攻陷
覽奏曷勝憤懣閩浙總督慶端身任兼圻遷延不進以致杭城失
陷實屬救援不力慶端著卽革職暫畱本任仍責令帶兵迅圖克
復浙江失陷各城以贖前愆兩江總督曾國藩有節制浙江全省
之責咎亦難辭著交部議處杭州將軍瑞昌浙江巡撫王有齡殉

難情形及在城文武下落著曾國藩慶端左宗棠查明具奏再降
諭旨補用總兵況文榜記名總兵羅大春吳再升副將貴廷芳陳
步高等將弁先後潰退並著曾國藩查明如有先期潰散情事卽
著嚴參治罪○諭議政王軍機大臣等僧格林沁等奏曹屬會匪
漸次歸正見在分剿豫境竄匪南捻棍匪籌議情形一摺曹屬會
匪屢經官軍剿敗荷澤等處俱無大股屯踞是賊匪漸知歸正著
卽飭該地方官將善後事宜妥爲辦理並接查餘匪以絕根株其
南捻劉添詳餘匪及汴塘賊圩費縣棍匪亦經該大臣飭令西凌
阿等分投剿辦著卽飭帶兵各員迅速進攻次第掃蕩以便移師
前進毛昶熙請飭該大臣以重兵駐亳州據云可以制其死命事
機萬不可緩是否可行著該大臣迅速籌奏將此由六百里諭令
知之○諭慶端屢請援浙迨聞浙報日警復藉口北路喫緊日事

遷延實屬心存畏葸見在浙江卒以待援不到力竭城陷著慶端
迅卽馳赴閩浙交界地方駐紮並迅催曾元福所募臺勇卽日內
渡並飭顏青雲由海道赴援乘該逆布置未定之時迅圖攻復省
城及失陷各郡縣以贖前愆儻敢仍前退縮致誤事機朕必重治
其罪決不寬貸左宗棠已授浙江巡撫責無旁貸刻下計已抵浙
著卽會合閩師分道進攻毋令該逆久踞曾國藩令鮑超進攻甯
國以便進規浙省爲左宗棠後路聲援此時賊中悍匪麇聚杭城
蘇常守禦必懈若能分兵直擣蘇常可由嘉湖以扼杭城之背使
該匪應接不暇未始非出奇制勝之策著曾國藩薛煥酌度情形
妥籌辦理至賊匪攻陷杭城後兇餒愈張勢將窺伺松滬並攔截
吳淞口以斷上海商民出入之路逆情實爲叵測不可不防著薛
煥卽飭曹秉忠等緩攻青浦先固內防滕嗣林所募楚勇已經抵

滬卽著妥爲布置以保完善之區曾國荃募勇曾否同營並著曾國藩催令統帶老勇八千人赴滬助剿既可防守上海兼可乘虛襲取青浦等處爲規復蘇常之計毋失事機浙江潰軍航海退至吳淞口著薛煥飭令吳淞口參將張鳳翔將潰軍船隻截留海口之外查明妥爲安插毋使奸匪溷迹將此由六百里加緊各諭令知之○諭據寶鋆將毛昶熙寄伊信函呈覽均已閱悉見已將嚴樹森調補湖北巡撫河南巡撫令鄭元善補授矣河南地處中州值此多事之秋全賴地方官紳和衷商辦以禦外患乃據毛昶熙稱嚴樹森於該學士兵餉任意裁減諸多掣肘是官紳旣已不和據稱與勝保齟齬亦非曲在勝保恐致貽誤大局鄭元善經朕特簡諒不至如嚴樹森之局度褊狹惟該撫蒞任伊始於防剿諸務尙資練習毛昶熙久辦軍務河南東面邊防是其專責見當髮捻

各逆麇聚窺伺該學士務當激勵兵練實力防剿使逆匪不敢正視歸陳方爲無負委任見在如何布置並著卽行馳奏其河北及南路防剿事宜該學士係幫辦之員亦應與鄭元善會商妥辦不得稍涉推諉至嚴樹森辦理諸多未協毛昶熙本應具摺奏聞卽著將信中所稱各情補行具奏將此由六百里諭令知之○朱崱以病免命祁寯藻以大學士銜爲禮部尙書前大學士○改水師提督彭玉麟以兵部侍郎候補○以剿山東會教各匪功予都統西凌阿優敘○己卯諭議政王軍機大臣等都興阿奏進攻天長連日獲勝並金陵逆援渡江一摺天六爲江北要隘楚師沿江掃蕩進規金陵必由天六爲進兵之地該逆在天長起造木城以爲抗拒之計並欲搭造浮橋木簰偷渡高寶湖鈔襲揚營後路直趨裏下河雖經都興阿前往督剿連獲大勝而城內踞匪尙有六千餘人

見在金陵股匪渡江已抵儀六聲稱攻撲揚城是其兇狡情形極爲可慮都興阿所部水陸兵勇本不甚厚而揚城實江北要區曾國藩節制兩江見籌進擣金陵巢穴自當通籌兼顧聯絡聲勢見在杭垣已失江浙賊氛徧地江南止有鎮江一隅爲進兵適中之地該大臣前奏李鴻章水陸各軍著迅速調撥布置起程抵鎮後卽飛速馳奏遲則此著又恐落後鮑超如克復甯國由廣德進剿亦可直達蘇常互相援應該大臣身任統帥事非越俎亦無旁貸不必稍避嫌怨總期於事有濟江浙等處軍務朕惟曾國藩是賴所有一切布置情形卽著迅速覆奏將此由六百里加緊諭令知之○諭逆匪竄陷杭州甯波等府沿海各口必須加意防範著薛煥將前次購買外國船礮寄諭及總理衙門所寄信函迅卽轉致勞崇光耆齡慶端瑞璜等會商籌出款項一體雇覓輪船派委得

力員弁挑選內地兵勇駛赴甯波海口合力堵剿轉瞬春水滋生防務萬分喫緊該督撫等當妥速辦理毋得藉端推諉貽誤事機大江師船近多朽壞前經寄諭勞崇光耆齡調撥紅單船隻來江以便裁撤更換何以尙未奏報起程見在吳淞口亟需水師防堵而船隻不敷分布著勞崇光耆齡迅卽調派守備李榮升黃聯開等管帶貞吉紅單拖罾等船星速來江交都興阿調遣毋稍遲誤該督撫務須嚴飭管帶員弁認真截剿果能奮勇出力定當破格施恩儻玩怯不前任令賊匪竄逸不獨將該員弁等從重治罪並將該督撫嚴加懲辦不稍寬貸其各懷遵無忽將此由六百里加緊各諭令知之○庚辰諭議政王軍機大臣等賈臻奏逆匪圍撲潁郡官軍力戰獲勝仍固守待援一摺勝保見擬移紮張秋將東省匪徒實力掃蕩自未能剋期南下著卽挑選得力將弁酌帶兵

勇星速前赴潁郡同賈臻合力兜剿毋稍遲誤前據勝保奏覆陳
皖豫軍務情形勢難輕身前往並歷陳嚴樹森辦理不善各摺片
詳加披覽時值皖撫彭玉麟奏請開缺而李續宜有願任皖事之
奏因俯從其請將彭玉麟開缺專辦水師李續宜調補皖撫嚴樹
森調補湖北巡撫係爲地擇人起見不僅因該大臣參奏爲此調
停之舉朝廷用封疆大吏出自特簡如果其人尙能實心辦事豈
因一二事辦理未協遂加擯斥卽如言路宏開以後謗毀勝保者
不知凡幾悉皆存而不論以示用人之專惟該大臣係 皇考文
宗顯皇帝棄瑕錄用之員總當返躬自責嚴以律己而寬以待人
方不失名臣矩矱該大臣膽勇頗有而嗜好亦多如能盡去所短
與士卒同甘苦實力剿除各匪不專以招撫爲事將直東交界次
第肅清則前此謗該大臣者未必非譽該大臣之人若專尙意氣

喜佞惡直則逢迎諂諛之人紛然得志甚至到處騷擾不能覺察則凡不肯阿附之地方官羣得起而與該大臣爲難斷不止嚴樹森一人亦安得盡劾而去之該大臣以古名臣自許古人所稱匈奴未滅無以家爲直東匪徒豈特匈奴之比自宜嘗膽臥薪滅此朝食自問能否如此存心朕惟冀該大臣保全名節用副 皇考委任之意嗣後當痛改前非親近正士和衷商酌毋以草率了事惟無瑕者可以責人儆勦賊無效以致謗議沸騰朕亦難盡拂眾論曲爲庇護也將此由六百里諭令知之○諭賈臻奏逆匪圍撲潁城力戰稍卻請飭援濟一摺袁甲三駐軍淮甸於潁郡賊情甫於昨奏探有苗練勾黨攻撲郡城之說賈臻所奏未知是否卽係此股潁郡一城關繫淮揚屏蔽北路當茲賊勢猖獗該大臣責無旁貸李世忠因賊擾全椒帶兵回滁見在潁郡有警自應催令迅

速趕回袁保恆回駐長淮衛亦應調回援剿以助兵力李續宜續調安徽巡撫該撫本以皖事自任皖省淮北地方僅有潁州郡城未陷務當速籌救援毋稍遲誤勝保勢難分身已諭令先行派撥兵勇赴潁援剿賈臻仍當就見有兵力竭力守禦不得專待援師稍涉鬆懈如潁城有失仍惟該署撫是問將此由六百里各諭令知之○諭薛煥奏江浙紳士呈請借調英法兩國兵眾剿賊據情代奏並將該紳等公稟信函呈覽各等語逆匪竄陷杭城上海一隅久爲垂涎之地見在該紳等既與巴夏禮議及自必深悉其情本日已飭總理衙門與英法在京使臣妥爲籌商但該使臣未必遽能順應而英法向以商人爲重並畏百姓著薛煥飭該紳等多集華商百姓剴切開導洋商令其轉求巴夏禮以洋商貨物在滬須撥兵助剿殄除粵匪方足以資保護且不獨商民均有利益卽

各省海口百姓知外國以義氣爲重將來亦均不至與洋人爲難
如此設詞或已夏禮卽允爲相助亦未可知惟事關借助外國兵
眾旣未能操縱自我尤當防患未萌該紳等所稱兩害相形則取
其輕自係確有所見且與巴夏禮亦有成說儻僅以索謝等事爲
請則尙可權許以救目前之急如其占據地方勾結逆匪阻撓官
兵進剿則當深思熟慮力持大體不可稍涉遷就除飭令總理衙
門竭力商辦以順輿情外並著薛煥督飭該紳等酌量辦理毋稍
拘泥毋涉大意將此由六百里諭令知之○辛巳以祫祭 太廟
上前期親詣行禮○諭議政王軍機大臣等嚴樹森奏正息土
匪圍撲信陽抽撥省防官兵往剿並籌堵遏苗逆請仍飭周鳳山
赴豫各一摺正陽等處匪徒竄踞陡溝圍攻信陽見經派委記名
總兵穆正春統帶馬步官勇往剿卽著鄭元善飭令該總兵星馳

前往乘該匪初起速行埽蕩毋畱餘孽平輿擒匪並飭張曜迅速進攻勿任句結爲患此時穆正春旣已派往信陽若俟該總兵剿辦事竣再赴沈項深恐緩不濟急見在歸陳邊防應如何嚴密布置知府李徵松扼防沈項能否得力楊飛熊一軍應否由省調往扼剿其余際昌所募楚勇應如何飛催來豫以資得力均著鄭元善毛昶熙悉心會商辦理河南爲直隸屏蔽畿輔安危關繫非細見在該省軍情惟歸陳最爲喫重係毛昶熙專責鄭元善統轄全省尤應面面俱到該撫等惟當事事和衷商酌以期悉臻妥善張曜帶兵素稱得力見已擢授藩司仍應令其管帶兵勇其河南布政使著鄭元善揀員奏請暫行署理嚴樹森卽著前赴湖北俾李續宜得以卽行赴皖豫省軍情正在喫緊所有穆正春楊飛熊等軍及該撫訓練各軍均著嚴樹森畱交鄭元善以資防剿無得帶

往楚省其副將周鳳山如已將所部舊勇募齊赴豫卽著鄭元善會同毛昶熙詳細察看以定去畱毋稍瞻徇將此由六百里諭令知之○調孫治爲直隸按察使吳廷棟爲山東按察使○壬午

上詣觀德殿 文宗顯皇帝几筵前行歲暮致祭禮○諭內閣朕

弟二阿哥著追封爲愍郡王○諭議政王軍機大臣等毓科奏浙逆竄近江境見飭各軍嚴防並募楚勇防堵石逆等語前因浙省軍務緊要屢經諭令左宗棠赴浙援剿昨因杭城失守復明降諭旨將左宗棠補授浙江巡撫並諭令會合閩師進取杭省力圖收復見據毓科所奏左宗棠僅分撥各軍往徽浙兩處防剿是該撫尙在江境並未親督兵勇入浙於浙省軍務仍屬無濟此時浙省逆燄方張勢將延及江境與其堵禦於廣饒境內不若乘賊匪未至以前迎頭截擊以固江省藩籬著左宗棠迅卽督率所部兵勇

親赴衢郡將開化及附近衢城股匪力行掃蕩並會合閩省援師及李元度進攻龍游之師節節進剿爲收復金嚴之計左宗棠身任浙省封圻責無旁貸自當力籌進取毋得再事遷延曾國藩見住安慶距皖南饒郡一帶較近著卽飭令徽防文武與左宗棠所撥兵勇合力堵截儻徽防兵力尙單卽由曾國藩迅速撥兵馳援李桓見署江西巡撫所有廣饒兩郡防務尤應力籌布置著卽一體嚴密堵禦毋稍大意石逆蹤迹飄忽靡常毓科見募楚勇二千著李桓於該勇到江時卽飭知州王沐管帶扼要嚴防毋得以賊蹤尙遠稍形疏忽將此由六百里加緊各諭令知之○諭山東省東昌府屬匪徒經勝保等剿撫兼施漸就肅清其曹屬會匪據僧格林沁奏稱亦已無大股屯踞漸次歸正第恐勝保赴潁以後北路旣無重兵或致復形蠢動僧格林沁見派西凌阿等剿辦南捻

劉添詳餘匪及汴塘等匪是否得手其餘直東交界能否兼顧譚廷襄見駐東昌亟應將接剿餘匪及撫馭降眾事宜妥爲經理並與遮克敦布聯絡聲勢毋令該省匪眾再得闖入直境勝保此行事非得已遮克敦布等威望較輕是否可恃尙難豫料卽著該大臣等將直東交界防剿事宜悉心會商迅速奏聞以重畿輔藩籬遮克敦布到防後本日業經諭令統歸該大臣節制仍准其會同王榕吉奏事再浙省自甯波鎮海失守杭州復陷各直省沿海口岸在在堪虞天津逼近畿輔亟應籌辦防堵見已飭令文煜及提督成明馳往天津會同崇厚調派官兵相度布置僧格林沁於天津地方情形至爲熟悉值此事機孔棘應如何策畫方可以固海防卽著該大臣妥爲酌議並直東交界防剿機宜一併具奏以備採擇天津官兵徵調已空本日業經諭令勝保將天津鎮標官兵

悉數調回歸伍該大臣前調往軍營之天津鎮額兵並著悉數飭令歸伍交文煜等調遣毋稍遲誤其山東煙臺等處並著譚廷襄妥籌防範將此由六百里各諭令知之○諭薛煥奏浙江省城失守以後蘇浙驍悍之賊圖犯上海已諭曾國藩等實力防剿矣東南賊勢鴟張若不能逞志於滬濱勢將折而北駛天津海口爲近畿要地恐該匪乘虛北犯亟應擇要設防著文煜崇厚成明馳赴天津海口察看形勢扼要設防並多設偵探備豫不虞無稍遲緩又聞在津洋商欲雇募廣勇防守海口如告以中國業經設防彼可恃以無恐可免別生枝節該督卽會同崇厚等商酌辦理濮范等處伏莽未清恐勝保南征又將蠢動文煜責無旁貸務須統籌兼顧責令王榕吉等實心按捕恩威並用以期肅清畿輔將此由五百里諭令知之○諭前據賈臻奏髮捻各匪竄撲潁州數日以

來未據賈臻續行奏報惟思陳張兩逆句結西竄勢極猖獗斷非賈臻所能抵禦勝保本以皖豫軍務自任卽由河南赴潁將髮捻各匪迎頭截剿其總兵成祿等並著催令星馳進發毋許遲誤該大臣威望較重必能速奏膚功惟前據奏稱皖豫兩省盼望該大臣之心甚爲切摯而該大臣所部兵勇向有騷擾習氣於經過地方務當約束嚴明秋毫無犯以慰輿情該大臣惟當力矢公忠時艱共濟朕於勝保係力排眾論特隆倚畀儻以束身不肅又致被人參劾勝保其何以對朕耶見聞苗練句結髮捻肆擾自已無就撫之意儻因勝保南行竟圖轉圜仍著相機辦理將此由六百里加緊諭令知之○諭據慶端奏馳抵建甯府城布置情形探聞杭州解圍並瑞璜奏收復福鼎縣城各摺片浙省於十一月二十八日失守該督十二月初七日奏報出省情形尙未略知消息反據

探稟以杭城解圍紹興收復等情謂浙省軍務漸有轉機以統轄兼圻之員且駐紮地方去浙境甚近何以形同聾瞶至於此極且安知勇丁楊姓非卽賊中奸細造作虛語懈我軍心慶端援浙之師遷延兩月方始馳駐建甯以致猾賊作此等伎倆情同玩弄若復以待兵待餉觀望不前必又株守建甯任令浙省爲賊久踞勢將不可收拾厥咎益重著慶端振刷精神卽飭道員李元度總兵林文察各軍分道馳赴杭州並迅催曾元福募勇內渡及顏青雲由海赴援乘逆匪布置未定之時迅圖攻復各城並確切偵探浙省情形應由何路進兵卽日統兵前進毋得再有貽誤致干重咎其温州平陽等縣會匪滋事雖經兵勇擊退瑞安解圍著仍飭署總兵葉炳忠等妥爲勦辦其福鼎縣城及分水關內賊匪業經勦辦肅清所有關外一帶匪徒著瑞璜卽飭總兵秦如虎等力加堵

蕩所有省城及各海口稽查防範事宜卽責成瑞璜妥爲布置毋許疏懈將此由六百里加緊諭令知之○癸未僧格林沁西凌阿國瑞奏魏灣踞賊經臣等督軍進剿該匪聞風逃竄十二月十七日擒匪郭秉鈞焦桂涓等帶領馬賊萬餘由河西竄回東岸徑奔曹郡荷澤縣知縣王朝翼帶領官兵團練遇賊接仗因眾寡不敵敗回守城臣等於十八日親督馬隊前赴曹州迎剿行至陳家集探悉該匪已向西南五伯岡逃竄臣等是日駐紮曹州迤西十九日拔營緊躡其後自韓集魏灣一帶追至崔家壩迤南見馬賊二千餘步賊萬餘分三路向南奔竄當卽督飭馬隊亦分三路衝擊該匪被剿窮蹙復向南竄我軍由崔家壩追至黃河南岸龍門口地方計程四十餘里沿途殲斃馬步賊匪數千名救出難民二千餘名郭秉鈞焦桂涓等僅帶馬賊數百名向東南遠遁步賊殲斃

殆盡因時已昏黑仍回魏灣紮營見在曹屬已無大股匪蹤止有各村逃回難民已飭署曹州府知府林士琦妥爲安插臣等見因曹州一帶漸就肅清擬卽日移紮單縣儻東昌一帶餘匪復聚譚廷襄兵力不足尙可抽撥勁旅前往會剿以期保衛直東 上諭內閣捻匪郭秉鈞等由河西竄回東岸徑奔曹郡經僧格林沁等親督馬隊迎剿該匪聞風向西南五伯岡逃竄官軍自韓集魏灣一帶追至崔家壩山崔家壩追至黃河南岸沿途殲賊數千名救出難民二千餘名曹州府一帶已漸肅清著卽督飭員弁實力稽查按捕餘孽毋令匪徒伏匿○僧格林沁奏前奉諭旨飭將移紮亳州情形迅速覆奏查各股捻匪老巢多在宿州之西南蒙城之左右亳州之東南一帶該逆若欲北來由歸德之永虞夏徐州之豐沛蕭碭直入山東之曹單魚臺或由宿徐北至韓莊八牖若重

兵紮於亳州偏向西南北距曹州二百餘里以次往東更慮鞭長莫及若派隊輪轉進攻賊圩使其不暇裝旗北來自應由西次第進攻即使得手距蒙宿賊圩尙遠東路捻眾豈能坐以待困勢必由豐碭韓莊鈔襲我軍之後我軍不得不回顧北路我軍一動亳州東南之賊勢將尾隨受其牽掣殊非善策亳州屯兵之請若保豫省則爲良策若衛東省兼之北固藩籬則不可行也臣擬俟曹屬肅清後卽行移營單縣者正欲觀皖捻之動靜剿撫兼施也至鄒縣教匪本年四五月間進攻五次未能得手因該匪占踞險要攻剿甚難且彼時曹屬會匪猖獗不能不移緩就急是以准令投誠無非暫時羈縻亦應有兵鎮壓待南捻情形稍鬆再行相機辦理至滕嶧棍匪前經德楞額等招安劉雙印牛際堂等見據該副都統稟稱因周克生爲邱壽所害降眾復萌故智接應汴塘之賊

臣見飭德楞額等詳查起釁之由俟辨明曲直再行覈辦如劉雙印實係無故反側自應撥兵往剿河北教捻各匪於本年五月十月兩次鴟張賊眾不過一兩萬勝保所統之軍暨譚廷襄所派兵勇未能立除賊氛五月間臣西凌阿統軍前往會剿十月復令國瑞督軍前往將兩次大股賊匪痛加剿洗勝保等方能辦理得手地方漸就肅清以一兩萬之會教各匪勝保尙不能獨力剿除又豈能當捻匪十餘萬之眾所有毛昶熙具奏勝保田在田等扼截北路一節尙未能深悉底蘊至勝保親赴張秋鎮調度之處查壽張地面前經臣與國瑞夾河剿辦一律肅清近復疊次派員查看居民照常安業並無賊蹤其曹屬一帶經臣等辦理漸已就緒亦無須前來會剿上諭議政王軍機大臣等亳州東南一帶賊圩林立若以重兵紮亳州距曹縣太遠以次往來更慮鞭長莫及該

大臣擬俟曹屬肅清卽移紮單縣可以觀捻匪動靜兼以固直東門戶籌畫均甚周密著照所議辦理見在曹屬已漸次肅清該大臣卽可統帶大兵節節進剿俾南捻應接不暇不敢窺伺山東其遮克敦布等接辦以後該大臣仍須指授機宜妥籌兼顧另片奏劉占考家屬暫緩給還等語若輩狼子野心自應俟剿賊立功後再將其家屬給還將此由六百里諭令知之○諭官文等奏擊退豫捻襄棗獲安並會商防剿苗逆情形各摺逆捻屢糾大股撲犯雖經官軍追逐出境湖北邊界見已肅清尙未悉數剪滅難保不乘間回竄著官文等督飭地方文武兵勇實力嚴防毋稍鬆懈如有乘虛竄突須與豫省官軍聯絡合力殄除至苗逆罪狀昭著亟應聲罪致討誠屬正論疊經寄諭李續宜等酌派得力之軍由三河尖繞至潁州與袁甲三合力進剿如果苗逆被剿窮蹙真心悔

罪一有轉圜該大臣亦可相機妥辦將此由六百里各諭令知之
○諭前因科道疊次參劾勝保喜佞惡直營中譏諂面諛之人紛
然得志曾諭令該大臣痛改前非親近正士原冀勝保接奉此旨
卽將營中著名劣員先行驅逐以保名節茲據嚴樹森奏稱前任
河南臬司周士鏜在豫時聲名狼藉見在該大臣軍營柔而害物
其胞弟按察使銜記名道周士鍵陰賊險狠勝保以陽分人受其
愚弄各等語周士鏜弟兄前在河南本係驕詔不知廉恥之員輿
論甚爲不愜本日已明降諭旨將周士鏜周士鍵革職逐出營伍
著勝保卽將該二員迅速勒令出營毋任逗遛此係久經訪聞卽
無嚴樹森參奏亦萬不可任用之員該大臣營中似此者尙屬不
少豈能相助爲理勝保當思一己之名節爲重斷不可受人愚弄
自損聲譽以副朕諄諄訓誡之意將此諭令知之○諭譚廷襄奏

督辦東昌善後事件並體察河北曹南各處情形及籌議進擣皖
巢各摺片直東竄匪疊經勝保督軍擊散其曹郡圍寨亦經僧格
林沁節次攻破勦撫兼施並將南捻擊退東省軍務大有轉機其
綏輯居民安插降眾及料理保甲團練等事宜該撫已揀派道員
楊紹和參將傅萬清等分投辦理著卽飭令該委員等會同各地
方官妥爲籌辦毋許草率了事將此由六百里諭令知之○添調
吉林馬隊三百名打牲烏拉壯丁五百名赴官文軍○是月緩徵
甘肅河州等十九州縣水雹霜凍災區節年額賦蠲緩山東濟甯
等七十三州縣暨齊河衛被水被旱被蟲被擾江蘇邳州等八州
縣海州等二十六州縣暨揚州徐州鎮江三衛被擾湖南澧州等
九州縣暨岳州衛被水災區新舊額賦並雜課福建連城等四縣
暨松溪縣丞屬被擾村莊上年額賦安徽宿州等十一州縣河南

信陽等四十八州縣被災被擾新舊額賦甯古塔旗民水災霜災
本年額賦暨應交倉穀並賑災民口糧蠲緩直隸開州等五州縣
被水被擾本年額賦暨民借倉穀賑開東明長垣災民口糧給元
城大名修屋銀○會計天下民穀數除未經冊報外男女共二萬
六千六百八十八萬九千八百四十五名口存倉米穀數共六百
二十三萬三千一百七石五斗一升三合一勺